


柳田文庫  
文庫11  
D 292  
108





文庫11  
D292  
108

宋史卷四百六十三

列傳第二百二十二

開府儀同三司 柱國 錄軍國軍事 前中書右丞相 監樞密院 史顧 經筵事 都總裁 脫脫等 猶

皇明朝列大夫 國子監祭酒 臣方從哲

承德郎 右春坊右中允 管國子監司業 爭臣 黃汝良等 奉

勅重校刊

外戚上

杜審琦

弟 審瓊 審審 審進 孫 守元 曾孫 惟序

從子 彦圭 彦鈞

賀令圖

附 楊重進

王繼勳

劉知信

子 承宗

劉文裕

劉羨

子 從德 從廣 孫 永年 馬季良 附

郭崇仁

楊景宗

符惟忠

萬曆二十七年刊

宋史卷四百六十三

列傳

御田象文

010190562765



柴宗慶

張堯佐

自西漢有外戚之禍歷代鑒之崇爵厚祿不異事權然而一失其馭猶有肺腑之變焉宋法待外戚厚其間有文武才諳皆擢而用之怙勢犯法繩以重形亦不少貸仁英哲三朝毋后臨朝聽政而終無外家干政之患將法度之嚴體統之正有以防閑其過歟抑毋后之賢自有以制其戚里歟作外戚傳

杜審琦定州安喜人昭憲皇太后之兄太后昆仲五人審琦最長其次審璿次審肇次審進世居常山以積善聞審琦仕後唐爲義軍指揮使天成二年卒年三十五審玉前一年卒年二十二太祖開國贈審琦左神武軍大將軍以其子彥超爲西京作坊使彥超卒贈左領軍衛大將軍

審瓊建隆初授檢校國子祭酒二年拜左領軍衛將軍三年與其弟審肇審進皆召赴闕審瓊改左龍武軍大將軍遷右衛大將軍乾德初領富州刺史三年以本官權判右金吾街仗事四年春步軍帥王繼勳坐事詔審瓊兼點檢侍衛步軍司事是秋卒年七十太祖爲廢朝三日發哀成服贈太保寧國軍節度使諡恭僖審瓊性醇質在公畏慎宿衛勤謹徼巡京邑里閭清肅人皆稱



之景德三年春加贈審瓊太傅妻吳氏陳留郡太夫人  
是秋改葬陪陵又贈審瓊太師中書令子彥圭

審肇建隆三年起家授左武衛上將軍檢校左僕射致  
仕賜第於京師乾德初領維州刺史開寶二年改左衛  
上將軍仍致仕三年起爲右驍衛上將軍俄出知澶州  
太祖以審肇未嘗歷郡務乃命司封郎中姚恕通判州  
事以左右之未幾河大決東滙于鄆濮數郡民田罹水  
害太祖怒其不卽時上言遣使案鞫遂論恕棄市審肇  
免官歸私第俄復舊官令致仕特以濰州刺史月奉優  
給之七年卒年七十二太祖廢朝二日素服發哀贈太

保昭信軍節度諡溫肅遣中使護喪事景德三年加贈  
太傅妻劉氏東海郡太夫人子彥遵至南作坊使

審進建隆三年起家授右神武大將軍改右羽林大將  
軍乾德元年領賀州刺史二年知陝州三年就改保義  
軍節度觀察留後五年加本軍節度太祖郊祀西洛審  
進來朝頒賚甚後太宗嗣位加檢校太傅太平興國二  
年會許昌齋刺號州摺拾使州闕失事上訴詔右拾遺  
李幹鞫之幹因上言請支郡不復隸藩鎮皆得專達從  
之三年秋以審進妻卒廢朝十一月郊禮畢加檢校太  
尉四年上親征河東審進與嵐州團練使周承晉德州



刺史孫方進成州刺史慕容福起皆上言願率所部擊太原上以審進耆年不許五年來朝是歲契丹寇邊出師捍禦上幸大名勞軍留審進警巡都邑肅然六年復歸陝親王宴餞供帳甚盛其年就加檢校太師九年夏上以審進年高不當煩以劇務授右衛上將軍奉給如故雍熙四年復授靜江軍節度端拱元年上親耕籍田審進預其禮恩賜彌渥加開府儀同三司是歲卒年七十九上趣駕臨喪哭之慟廢朝三日設次成服親王公主以下並詣其第舉哀贈中書令諡恭惠審進鎮陝二十餘年勸農敦本民庶便之雖居位節制無驕矜之色

入推其醇厚景德二年追封京兆郡王妻趙氏南陽郡

夫人後贈尚書令子彥鈞彥彬彥彬至禮賓副使而

卒

彥圭起家六宅副使遷翰林使開寶五年領信州刺史六年改領饒州團練使俄加領本州防禦使從征太原與曹翰孫繼業攻城西面北征班師命彥圭與孟玄喆藥可瓊趙延進率兵屯中山坐市竹木矯制免筭責授洛苑使饒州刺史裁數日牽復餘年遷沙州觀察使出知定州雍熙中北伐命副米信爲幽州西北道行營都部署彥圭不容軍士哺食設陣不整以致亡失坐左遷



均州團練副使雍熙三年卒于貶所年五十九贈歸義軍節度景德二年春加贈中書令是秋又贈太師子守元

彥鈞起家補供奉官累遷崇儀使端拱初加莊宅使領羅州刺史淳化四年特置昭宣使以彥鈞洎王延德王繼恩爲之未幾加領恩州防禦使西鄙用兵命爲永興軍駐汧鈐轄真宗嗣位改領潁州防禦使出知河中府占謝便坐求解內使之職可之歷知邠慶延鳳四州景德中爲天雄軍副都部署車駕駐澶淵爲駕前東面具冀路副都部署契丹騎兵攻月城彥鈞率兵擊走之以

勞優加封邑召還再任河中彥鈞由戚里進保位而已嘗有言政事不舉者徙西京水南北都巡檢使大中祥符五年復知莫州馬知節爲潁州防禦使彥鈞換秦州九年拜密州觀察使出爲并代副都部署天禧元年卒贈安化軍節度錄其子贊文爲供奉官贊寧爲殿直孫宗壽爲三班奉職

守元開寶中補左班殿直得侍便殿帶御器械遷供奉官莫州監軍契丹入邊與州將固守城壁出兵邀擊獲生口羊馬以功加崇儀副使未幾改正使秩歷如京洛苑使至道三年領梧州刺史連爲并代鎮定高陽關鈐



韜大中祥符二年副趙積使契丹復涖鎮定頃之屬疾  
詔遣其子殿直惟慶挾太醫乘驛診候既至而卒年五  
十八

惟序字舜功自三班奉職累遷知惠州莫州以供備庫  
使爲梓夔路鈐轄徙懷慶路知邠州又權慶州會任福  
敗以騎兵數千繇懷安路破賊三砦斬首數百級獲牛  
馬千計以功領忠州刺史爲涇原鈐轄敕巡警邊州又  
之改六宅使知雒州時契丹勒兵燕薊間遣使求割地  
未至而惟序購得其草先以聞徙知滄州又徙定州再  
遷東上閤門使知涇州改四方館使知瀛州復知滄州  
入朝爲邠州團練使出知恩州徙大名府路總管改乾  
州團練使卒

賀令圖開封陳留人父懷浦孝惠皇后兄也仕軍中爲  
散指揮使太平興國初出爲岳州刺史領兵屯三交雍  
熙三年從楊業北征死於澤令圖少謹愿隸太宗左右  
洎卽位補供奉官改綾錦副使知莫州遷崇儀使知雒  
州雍熙二年領平州刺史充幽州行營壕砦使以所部  
下固安新城兩縣克涿州會父戰死起家爲六宅使領  
本州團練使護瀛州屯兵先是令圖握兵邊郡十餘年  
恃藩邸舊恩每歲入奏事多言邊塞利害及幽薊可取



之狀上信之故有岐溝之舉既而師敗議者皆咎其貪  
功生事令圖輕而無謀契丹將耶律遜寧號于越者使  
謀給令圖曰我獲罪本國旦夕願歸南朝無路自拔幸  
君侯少留意焉令圖不虞其詐私遣以重錦十兩是年  
十二月于越率衆入寇大將劉廷讓與戰于君子館令  
圖爲先鋒被圍數重于越傳言軍中願得見確州賀使  
君令圖嘗爲所紿意其來降而終獲大功卽引麾下數  
十騎逾之將至其帳數步外于越據床罵曰汝常好經  
度邊事乃今送死來邪麾下左右盡殺其從騎反縛令圖  
而去令圖與其父首謀北伐一歲中父子皆陷焉令圖  
時年三十九是役也武州防禦使高陽關部署楊重進  
死之

重進太原人少有膂力周祖鎮大名以隸帳下廣順初  
補衛士宋初累遷至內殿直都虞候太平興國初改龍  
衛軍都校領徐州刺史從征太原出爲萊州刺史隨曹  
彬北征爲右廂排陣使改武州防禦使高陽關都部署  
會契丹兵至與之力戰遂沒於陣年六十五

王繼勳彰德節度饒之子孝明皇后同母弟也生時其  
母見一人赤髮狀貌怪異入室中途生繼勳及長美風  
儀性兇率無賴以后故爲內殿供奉官都知溪州刺史



建隆二年加領恩州團練使又改龍捷右廂都指揮使尋領永州防禦使四年收復湖南改領彭州防禦使是秋將討西蜀命繼勳戒期將大閱繼勳素與太校馬仁瑀不協陰勒部下市白挺將以相圖太祖知之爲出仁瑀密州俄遷保寧軍節度觀察留後領虎捷左右廂都虞候權侍衛步軍司事繼勳所爲多不法會新募兵千餘隸雜武將遣出征多無妻室太祖謂繼勳曰此必有願爲婚者不須備聘財但酒炙可也繼勳不能諭上旨縱令掠人子女京城爲之紛擾上聞大驚遣捕斬百餘人人情始定時后已崩上追念后故不之罪也乾德四年繼勳復爲部曲所訟詔中書鞠之解兵柄爲彰國軍留後奉朝請繼勳自以失職常怏怏專以鬻割奴婢爲樂前後多被害一日天雨墻壞羣婢突出守國門訴寃上大駭命中使就詰之盡得繼勳所爲不法事詔削奪官爵勒歸私第仍令甲士守之俄又配流登州未至改右監門率府副率開寶三年命分司西京繼勳殘暴愈甚強市民家子女備給使小不如意卽殺食之而棺其骨棄野外女僧及鬻棺者出入其門不絕洛民苦之而不敢告太宗在藩邸頗聞其事及卽位人有訴者命戶部員外郎知雜事雷德驤乘傳往鞫之繼勳具伏自開



寶六年四月至太平興國二年二月手所殺婢百餘人  
乃斬繼勳洛陽市及爲彊市子女者女僧八人男子三  
人長壽寺僧廣惠常與繼勳同食人肉令折其脛而斬  
之洛民稱快其後家寓西洛潁陽孫惟德不肖不能自  
立丐食以給真宗聞而憫之授惟德汝州司士叅軍

劉知信字至誠邢州人父遷晉天福末鳳翔帳前軍使  
改滑州奉國軍校從驍將皇甫暉禦邊有功早卒母卽  
昭憲太后之妹也乾德初封京兆郡太君六年進本郡  
太夫人開寶三年十月卒太祖廢朝發哀追封齊國太  
夫人陪葬安陵贈遷太保知信三歲而孤宣祖憐其敏

慧建隆三年起家授供奉官丁內艱轉六宅副使開寶  
五年遷軍器庫使掌武德司六年領錦州刺史屬郊祀  
西洛爲行宮使駐洛中又爲西京武德皇城宮苑等使  
車駕出郊又充大內留守太宗卽位進領本州團練使  
拜武德使從征河東又爲行宮使太平興國五年坐遣  
親信市竹木於秦隴矯制免所過筭緡入官多取其直  
左授軍器庫使領錦州刺史俄復爲武德使會改武德  
爲皇城司卽爲皇城使七年坐秦王廷美事改右衛將  
軍是秋出爲靜難軍節度行軍司馬九年起爲左衛將  
軍領營州刺史雍熙初改左神武軍將軍尋領檀州團



宋史卷之九 列傳 九  
繚使護屯兵于鎮州會大舉北伐與六宅使符昭壽爲  
押陣都監師還諸將失道知信獨整所部以歸俄知定  
州兼兵馬鈐轄押大陣右偏一日宴犒將士契丹騎乘  
間至知信不介而出追之數十里斬獲甚衆以功就拜  
邕州觀察使四年召入改并州路副都部署端拱中代  
還知杭州淳化四年又知天雄軍府太宗崩充脩奉永  
熙陵部署咸平初拜建武軍節度觀察留後知永平軍  
府契丹犯邊復知天雄軍真宗北巡充駕前副都部署  
歷知河陽昇州景德元年車駕幸澶淵命爲東京都巡  
檢使復知定州二年以疾求還京至鎮州卒年六十三

廢朝贈太尉天平軍節度使知信以戚里致貴尤被親任  
中外踐歷最爲舊故雖無顯赫稱亦以循謹聞于時子  
承宗承渥

承宗幼善射兼習書數以蔭補殿直寄班祇候咸平初  
轉供奉官鎮定高陽關三路承受公事還掌軍器庫會  
真宗臨幸見其整肅面授閣門祇候知信卒轉內殿崇  
班未幾爲河北緣邊安撫都監大中祥符初就加內殿  
承制歷如京文思二副使徙河東緣邊安撫又知保州  
俄拜東染院使知定州副薛瑛使契丹使還 歸本任  
又兼鎮定路兵馬鈐轄俄改宮苑使知雄州河北緣邊



安撫使在郡有治迹詔書嘉獎召歸時靈昌決河初塞  
擇守臣以承宗爲皇城使知滑州未幾復代還會西邊  
言吐蕃唃廝囉作文法頗爲邊患命副龍圖閣直學士  
陳堯咨爲鄜延邠寧環慶涇原儀渭秦州路巡撫使詔  
令堯咨等所至軍州犒官吏將校諮訪民間利害郡官  
使臣能否功過以聞或有陳訴屈抑經轉運提點司區  
斷不當卽按鞫詣實杖以下依法區理徒以上驛聞仍  
取繫囚躬親錄問催促論決旣行就命堯咨知秦州承  
宗爲西上閤門使充鈐轄乾興初進東上閤門使徙鄜  
延都鈐轄而卒中使護柩至京師賜以葬地承渥蔭補  
殿直累任使喜爲條奏至供奉官閤門祗候承宗子承  
釗右侍禁閤門祗候

劉文裕字以寧保州保塞人祖正晉幽州營田使兼平  
州刺史父審奇武牢關使簡穆皇后卽文裕祖姑也審  
奇三子長文遠建隆中爲供奉官與并人戰萬善而沒  
次卽文裕開寶四年起家補殿直八年權管雲騎員僚  
直預計江南中弩矢神色自若太宗在藩邸多得親接  
太平興國二年擢爲內弓箭庫副使特封其母張氏清  
河縣太君出爲秦隴巡檢有李飛雄者太保致仕鱗之  
孫秦州節度判官若愚之子性兇險不爲其家所容常



往來京師魏博間與無賴惡少游處縱酒蒲博爲務以其父故盡知秦州倉庫所積及地形險易兵籍多少又有妻父張季英爲鳳翔蓋屋尉飛雄自京師往省之因乘季英馬詐爲使者夜抵廐置呼卒索馬卒秉炬出迎飛雄以私市馬纓示之卒不能辨卽授以馬一卒乘一馬前導以巡邊爲名因矯詔率巡驛殿直姚承遂至隴州率監軍供奉官王守定至吳山縣率縣尉盧贊皆從行先是秦州內屬羌人爲寇朝廷遣周承璿田仁朗王侁梁崇贊韋韜馬知節及文裕領兵屯清水縣飛雄至稱制盡縛之承璿等見姚承遂數輩同至不覺其詐仁朗獨號泣求詔書飛雄叱之曰我受密旨以若輩逗撓不用命令盡誅汝豈不聞封州殺李鶴邪詔書汝豈得見先是上卽位分命親信於諸道廉官吏善惡密以聞嶺南使者言封州李鶴不奉法誣奏軍吏謀反詔卽誅之故飛雄引以爲言將械承璿等詣秦州戮之因據城叛遂驅承璿等行初飛雄詐宣制時自言我上南府時親吏文裕因哀告飛雄曰我亦嘗依晉邸使者豈不營救之乎飛雄低語謂文裕曰爾能與我同富貴否文裕覺其詐僞許之飛雄卽命左右釋文裕縛文裕策馬前附耳語仁朗仁朗佯墜馬若卒中風眩狀飛雄共前視



之又釋其縛仁朗奮起搏飛雄與文裕共擒之飛雄尚呼云田仁朗等謀反殺使者送秦州獄鞫得實飛雄承遂守定贄坐要斬夷飛雄家捕先與飛雄善者何大舉等數輩悉棄市厥置卒亦夷其族因下詔中外臣庶之家子弟或有乖檢甚爲鄉黨所知雖加戒勗曾不悛改者並許本家尊長具名聞州縣遣吏錮送闕下當配隸諸處敢有藏匿不以名聞者異時醜狀彰露其功以上悉以其罪罪之文裕後遷軍器庫使四年車駕征太原命文裕與通事舍人王侁分兵控石嶺關六年領儒州刺史明年爲高陽關都監會契丹高餘曠入文裕與大

將崔彥進擊郤之雍熙初徙屯三交加領順州團練使會李繼遷率折遇也寇邊初詔田仁朗與王侁等討之仁朗坐逗遛命文裕代仁朗繼遷等遁去從潘美北征坐陷失驍將楊業削籍配隸登州事具業傳歲餘上知業之陷由王侁召文裕還俄起爲右領軍衛大將軍領端州團練使封其母清河郡太夫人賜翠冠霞帔授其弟文質殿直踰月文裕遷容州觀察使出爲鎮州兵馬部署端拱元年卒於屯所年四十五上甚悼惜贈寧遠軍節度命中使護喪歸葬京師弟文高至供奉官閤門祗候文質至內園使連州刺史



劉美字世濟并州人四世祖質絳州刺史曾祖維嶽不  
仕祖延慶右驍衛將軍父通宋初掌禁旅從潘美征廣  
南又累戰北面積勞至虎捷都指揮使領嘉州刺史太  
平興國中扈蹕太原卒于師贈潁州防禦使長女爲真  
宗德妃加贈定國軍節度兼侍中大中祥符五年德妃  
正位中宮又贈維嶽忠正軍節度檢校太傅延慶彰德  
軍節度檢校太尉通宋興軍節度兼中書令追封曾祖  
母宋氏吳國太夫人祖母河南縣君元氏許國太夫人  
母龐氏徐國太夫人初通之卒寔京城西天禧二年詔  
贈太師尚書令諡武懿七月遣昇王府諮議參軍張士

遜其肉薄鼓吹改葬于祥符鄧公原皇后親臨奠真宗  
御製祭文置靈坐右美卽后之兄也初事真宗于藩邸  
以謹力被親信卽位補三班奉職再遷右侍禁咸平中  
傅潛失律流房州擇美監軍及徙潛潁州又爲自京至  
陳穎巡檢石保吉在陳州大治解舍脩城壁不以聞僮  
奴輩假威擾民會有言者遣美廉其狀美曰保吉世受  
國恩擁高貲列藩園營繕過度拙於檢下誠或有之自  
餘保無他患上意乃解歸朝充閣門祗候大中祥符二  
年護屯兵于漢州歷遷供奉官徙嘉州士卒有病皆給  
醫藥親察視撫循之召還改內殿崇班提點在京倉場



東西八作司以舉職聞遷洛苑副使八年預脩大內以  
勞改南作坊使同勾當皇城司天禧初遷洛苑使領勤  
州刺史與周懷政聯職懷政姦恣美未嘗阿附懷政左  
右有過必痛繩之親從卒偵邏者多不時更易美按籍  
分番次均使焉上屢欲委之兵柄以皇后懇讓故中興  
者數四三年授龍神衛四廂都指揮使領昭州防禦使  
改侍衛馬軍都虞候五年加武勝軍節度觀察留後卒  
年六十廢朝三日贈太尉昭德軍節度錄其子從德世  
備庫使從廣內殿崇班旁親遷補者數人追封美亡妻  
宋氏河內郡夫人仁宗嗣位尊皇后為皇太后贈維嶽

鎮寧軍節度兼侍中延慶建雄軍節度兼中書令通彭  
城郡王曾祖母宋氏陳國太夫人祖母元氏衛國太夫  
人母龐氏鄆國太夫人美亦贈侍中天聖二年郊祀加  
贈維嶽彰信軍節度兼中書令延慶鎮安軍節度兼中  
書令通鄭王宋氏楚國太夫人元氏韓國太夫人龐氏  
魏國太夫人五年再郊又贈維嶽天平軍節度中書令  
兼尚書令延慶彰化軍節度許國公通開府儀同三司  
魏王宋氏安國太夫人元氏齊國太夫人龐氏晉國太  
夫人

從德和州刺史從廣內殿承制有龔知進者即通之友



壻也亦贈衛尉卿其妻追封南安郡君從德子復本父  
美卒年十四自殿直遷至供備庫副使弟從廣是歲始  
生亦補西頭供奉官遷內殿崇班太后臨朝從德以崇  
儀使真拜恩州刺史改和州又遷蔡州團練使出知衛  
州改恩州兵馬都總管知相州從德齒少無才能特以  
外家故恩寵無比其在衛州縣吏李熙輔者善事從德  
乃薦其才於朝太后喜曰兒能薦士知所以爲政矣卽  
擢熙輔京官從事鄭驥因緣從德亦擢美官從德妻嘉  
州王蒙正女也蒙正家豪右以厚賂結納至郎官爲郡  
守旣而從德病召還道卒年二十四贈保寧軍節度使

封榮國公諡康懷太后悲憐之尤甚錄內外姻戚門人  
及僮隸數十人從德娣壻龍圖閣直學士馬季良母越  
國夫人錢氏兄惟演子集賢校理暖及蒙正皆遷二官  
尚書屯田員外郎戴融嘗佐從德衛州以爲三司度支  
判官御史曹脩古楊偕郭勸推直官段少連上疏論之  
皆坐貶子永年

從廣字景元少出入禁中侍仁宗左右太后愛之如家  
人子太后崩真拜崇州團練使娶荆王元儼女爲滁州  
防禦使時年十七趙元昊反從廣自言待罪行間不能  
扞患疆場坐耗縣官願上所給公使錢帝嘉納之爲羣



牧都監改副使從廣自爲防禦使十年不遷特拜宣州  
觀察使同勾當三班院請補外自效以知洛州漳水溢  
從廣穿隋故渠以殺水勢洛人便之徙邢州籍鄉軍之  
罷老者聽引子弟自代著爲令召還復領三班院出知  
襄州徙真定府路馬步軍副都總管卒贈昭慶軍節度  
使諡良惠從廣性謹飭然喜交士大夫時頗稱之

永年字君錫生四歲授內殿崇班許出入兩宮仁宗使  
賦小山詩有一柱擎天之語帝誤投金杯瑤津亭下戲  
謂左右曰能取之乎永年一躍持之而出帝拊其首曰  
奇童子也常置內中十年十二始聽出外累遷廉州團練

使爲陝州都監郭邈山等爲盜永年密遣壯士夜渡河  
殺其凶桀二十餘人衆遂散遷鈴轄代還召見問破賊  
狀擢幹辦皇城司改單州團練使永興軍路總管契丹  
遣使來請帝繪像選副張昇報使契丹以未得志夜取  
巨石塞驛門衆皆恐永年素有力手擲棄之契丹驚以  
爲神出知涇州帝賜詩寵之郡兵歲以香藥爲折支三  
司不時輦致振武卒素驕突入通判聽事請以他物代  
給謹譁語不遜永年召至庭下數其罪斬爲首二人餘  
不敢動同提舉在京諸司庫務凡三除防禦使皆爲言  
者所論而寢知代州契丹取西山木積十餘里輦載相



屬於路前守不敢過永年遣人焚之一夕盡上其事帝稱善契丹移檄捕縱火盜永年曰盜固有罪然發在我境何預汝事乃不敢復言帝嘗問禦戎策對合旨書忠孝字以賜英宗立遷沂州防禦使復知代州歷步軍馬軍殿前都虞候太原定州路副都總管王師征安南永年請先士卒度富良江取賦以獻不許遷邕州觀察使步軍副都指揮使卒贈崇信軍節度使諡曰莊恪

馬季良字元之開封府尉氏人家本茶商娶劉美女初補越州上虞尉改祕書省校書郎知明州鄞縣入爲刑部許覆官太后臨朝遷光祿寺丞頃之擢祕閣校理同

判太常禮院再遷太子中允判三司度支勾院以太常丞直史館提舉在京諸司庫務擢龍圖閣待制三丞充近職非故事也遷尚書工部員外郎龍圖閣直學士同知審官院劉從德卒遺表季良遷二官辭不就而請以其子直方爲館閣讀書會江南旱出爲安撫使再遷兵部郎中太后崩換濠州防禦使赴本州御史中丞范諷言季良微倖得官降屯衛將軍滁州安置開封府劾奏季良冒立券庇占富民劉守謙免戶役詔許季良自陳以地給還歲餘徙壽州致仕還京師卒季良因緣以進無他行能在禮院嘗建言攝祠事官致齋三日無供帳



飲食非所以重祠事也自是翰林儀鸞司供帳太官給食於祠所云

郭崇仁字永年守文之子章穆皇后弟也淳化四年補左班殿直遷東頭供奉官閣門祗候契丹入寇齋密詔諭河北諸將還奏稱旨累遷崇儀副使兼閣門通事舍人章穆崩特除莊宅使康州刺史再遷宮苑使昭州團練使丁母憂起復雲麾將軍拜解州團練使改蔡州擢捧日天武四廂都指揮使賀州防禦使高陽關路馬步軍副都總管以疾落軍職改磁州防禦使卒贈彰德軍節度觀察留後崇仁雖外戚朝廷未嘗過推恩澤其爲

解州團練使十年不遷嘗除知相衛二州皆辭不行蓋性慎靜不樂外官也

楊景宗字正臣章惠皇太后從父弟少蒲博無賴客京師以罪黜隸致遠務章惠入宮爲美人奏補茶酒班殿侍累遷西頭供奉官閣門祗候坐事降左符禁郢州兵馬都監未久復官累遷東染院副使章惠爲太后進崇儀使領連州刺史揚州兵馬鈐轄未幾授秦州刺史徙滑州鈐轄遷舒州團練使爲兵馬總管章惠崩遷成州防禦使坐入臨皇儀殿被酒謹諫出爲兖州總管改天雄軍副都總管時呂夷簡守魏常以宮屬禮節戒之而



景宗肆志不悛遂以不法奏貶齊州都監徙衛州又徙  
鄆州鈐轄召還同勾當景靈宮提舉四園苑章獻章懿  
二后升祔太廟帝念章惠故特拜景宗徐州觀察使給  
留後奉逾年領軍頭引見司出知磁州爲建寧軍節度  
觀察留後知潞州給節度使奉領皇城司坐衛士入禁  
中謀爲亂貶徐州觀察使知濟州還提舉萬壽觀復建  
寧軍留後復領軍頭引見又坐從卒王安挾刃入皇城  
謫左監門衛大將軍均州安置起爲汝州鈐轄祀明堂  
覃恩願還所改官求爲郡帝謂輔臣曰景宗性貪虐老  
而益甚郡不可予也乃復以爲建寧軍留後提舉四園  
苑改提舉在京諸司庫務卒贈安武軍節度使兼太尉  
諡莊定景宗起徒中以外戚故至顯官然暴戾所至爲  
人患復使酒任氣在滑州嘗毆通判王述仆地帝深戒  
毋飲酒景宗雖書其戒坐右頃之輒復醉其奉賜亦隨  
費無餘始宰相丁謂方盛築第敦教坊景宗爲役卒負  
土第中後謂敗仁宗以其第賜景宗居三十年乃終  
符惟忠字正臣彥卿曾孫也以外祖母賢靖大長公主  
廢爲三班奉職後擢閣門通事舍人勾當東排岸司三  
司使寇瑊繩下急漕米數不足綱吏卒率論以自盜惟  
忠爭曰在法欠不滿四百者不坐若以自盜論則計直



八百卽當坐徒矣。瑊怒曰：「敢抗三司使，邪！惟忠曰：『職有當辨，非抗也。』」瑊益怒。惟忠爭愈力，如所議乃已。以西染院副使權提舉倉草場，提點開封府界縣鎮公事，開封主簿樂誥宰相王曾外孫也。或風使薦之，惟忠不從，曰：「誥無善狀，安可以勢使我？旣而誥果以賊敗，時吳奎爲長垣尉，惟忠厚遇奎，白府共薦之。惠民河與刁河合流，歲多決溢，害民田，惟忠自宋樓鎮碾灣橫隴村置二斗門，殺水勢以接鄭河，圭河自是無復有水害。陝西用兵，除涇原路兵馬鈐轄兼知涇州三司使，鄭戩奏留都大管勾汴河使，建議以爲渠有廣狹，若水闊而行緩，則沙伏而不利於舟，請卽其廣處束以木岸，三司以爲不便，後卒用其議。再遷西上閣門副使，契丹遣使求地，惟忠副富弼往報，使遷閣門使至武彊縣疽發背卒，贈客省使眉州防禦使。

柴宗慶字天祐，大名人。祖禹錫，鎮寧軍節度使。父宗亮，太子中舍。宗慶尚太宗女魯國長公主，升其行爲禹錫子，拜左衛將軍、駙馬都尉，領恩州刺史。禹錫卒，眞拜康州防禦使，改復州舊制。諸公主宅皆雜買務市物，宗慶遣家僮自外州市炭，所過免筭，至則盡鬻之，復市於務中，自是詔雜買務罷。公主宅所市物從祀汾陰爲行宮。



四面都巡檢進泉州管內觀察使又自言陝西市材木至京師求蠲所過稅真宗曰向諭汝毋私取以奪民利今復爾邪旣而河東提點刑獄劾宗慶私使人市馬不輸稅貸不問授武勝軍節度觀察留後歷拜彰德軍節度使仁宗卽位徙靜難軍又徙永清彰德軍拜同中書門下平章事徙節武成軍出知澶州未行改陝州潞州後判鄭州以縱部曲擾民召還奉朝請歲減公用錢四百萬久之出判濟州用御史中丞賈昌朝言留不遣盡停本使公使錢卒贈中書令諡曰榮密主累封楚國大長公主先宗慶沒宗慶歷官多過失性極貪鄙積財鉅萬而薄於自奉甚至優人以爲戲宗慶雖知莫能改也無子及終願以貲產送官仁宗以其女尚幼不許人謂宗慶選尚榮貴逾四十年晚上積奉以裨軍用蓋亦追補前過云

張堯佐字希元河南永安人溫成皇后世父也舉進士歷憲州筠州推官吉州有道士與商人夜飲商人暴死道士懼而遁爲邏者所獲捕繫百餘人轉運使命堯佐覆治盡得其寃改大理寺丞知汜水縣遷殿中丞知犀浦縣犀浦地狹民繁多田訟堯佐正其疆界條衆敝以曉之訟遂簡知開州還判登聞鼓院時溫成方爲脩媛



欲以門閥自表異故堯佐稍進用權開封府推官又提  
點府界公事諫官余靖言用堯佐不宜太遽頃者郭后  
之禍起於楊尚不可不監未幾遷三司戶部判官又爲  
副使擢天章閣待制吏部流內銓累遷兵部郎中權知  
開封府加龍圖閣直學士遷給事中端明殿學士拜三  
司使明年諫官包拯陳升之吳奎言比年以來水冒城  
郭地震河溢蓋小人道盛天下皆謂堯佐主大計諸路  
困於誅求內帑煩於借助法制刻敝實自堯佐臣等竊  
惟親昵之私聖人不免惟處之有道使不踐危機斯爲  
得矣仁宗祀明堂改戶部侍郎尋拜淮康軍節度使羣  
牧制置使宣徽南院使景靈宮使賜二子進士出身拯  
等復言陛下卽位僅三十年未有失道敗德之事乃五  
六年來擢用堯佐羣口竊議以謂其過不在陛下在女  
謁近習與執政大臣也蓋女謁近習知陛下繼嗣未立  
旣有所私莫不潛有趨向執政大臣不能規諫乃從諛  
順旨高官要職惟恐堯佐不滿其意致陷陛下於私昵  
後宮之過制下之日陽精晦塞氛霧蒙宇宜斷以太義  
亟命追寢必不得已宣徽節度擇與一焉如此則合天  
意順人情矣御史中丞王舉正留百官班欲廷議不許  
乃詔曰近臺諫官乞罷堯佐三司及言不可用爲執政



若優與之官於體爲善朕用其言遂有是命令復以爲  
不可前後反覆於法當黜其令中書戒諭之自今言事  
官相率上殿先取旨是日堯佐辭宣徽景靈使從之未  
幾復以宣徽使判河陽舉正又抗章論之至于三時吳  
育判西京留臺河陽民訟有不決者多詣育育於狀尾  
判出直堯佐畏恐卽奉行之召還徙鎮天平軍卒贈太  
師賜其家餼舍錢日三千堯佐起寒士持身謹畏頗通  
吏治曉法律以戚里進遽至崇顯戀嫪恩寵爲世所鄙  
子山甫引進副使樞密副都承旨從弟堯封孝謹好學  
舉進士爲石州推官卒次女卽溫成皇后也累贈至中

書令清河郡王諡曰景思

宋史卷四百六十三終

萬曆二十七年刊



宋史卷四百六十四

列傳第二百二十三

開府儀同三司柱國鎮寧軍節度使前書右丞相監脩國史領經筵事都總裁脫脫等脩

皇明朝列大夫國子監祭酒臣方從哲

承德鄧春坊右中允管國子監司業事臣黃汝良等奉

勅重校刊

外戚中

王貽永

李昭亮

李用和

子璋璋

李遵勗

子端懿端愿端慤  
端愿子評

曹侂

從弟偕  
子評誘

高遵裕

弟遵惠從姪士林士林  
子公紀公紀子世則

向傳範

從姪經綜經  
子宗回宗良

張敦禮

任澤

萬曆二十七年刊

宋史卷四百六十四

列傳

一



王貽永字季長溥之孫也性清慎寡言頗通書不好聲  
技初生十餘歲時其舅魏咸信見而奇之曰後當類我  
咸平中尚鄭國公主授右衛將軍駙馬都尉從封泰山  
領高州刺史再遷右監門衛大將軍獎州團練使求外  
補得知單州真宗戒之曰和衆靜治卿所當先也真拜  
洺州團練使徙徐州河決滑州徐大水貽永作隄城南  
以禦之改衛州團練使進懷州防禦使知澶定二州徙  
成德軍會有告曹汭變者貽永奏治之遷耀州觀察使  
復知澶州歷彰化武定軍節度使觀察留後拜安德軍  
節度使出知天雄軍徙保寧軍節度使知鄆州州自咸  
平中徙城而故治爲通衢介梁山春夏多水患貽永楛  
度地勢爲築東西道三十餘里民便之復徙定州又徙  
成德軍擢同知樞密院事改副使加宣徽南院使進樞  
密院使乂之拜同中書門下平章事遂加兼侍中徙節  
鎮海以疾求罷手詔撫諭遣上醫診視帝臨問頒尚方  
珍藥手取糜粥食之貽永自言寵祿過盛願罷樞筦解  
平章事樞密使如故疾稍間入見命其子道卿掖登垂  
拱殿仍賜五日一朝遇朝參起居許休於殿側至和初  
復以疾辭拜尚書右僕射檢校太師兼侍中景靈宮使



卒贈太師中書令諡康靖當時無外姻輔政者貽永能遠權勢在樞密十五年迄無過失人稱其謙靜子道卿西上閤門使

李昭亮字晦之明德太后兄繼隆子也四歲補東頭供奉官許出入禁中繼隆北征契丹遣昭亮持詔軍中問方略及營陣衆寡之勢昭亮年雖少還奏稱旨累遷西上閤門使出爲潞州兵馬鈐轄徙領麟府路軍馬事尋爲管勾軍頭引見司兼三司衙司軍士有逃死而冒請官廩者數百人昭亮按發之領高州刺史知代州以四方館使復領麟府路軍馬事遷引進使領賀州團練使

歷知瀛定二州成州團練使寧州防禦使延州觀察使臧德軍節度觀察留後擢殿前都虞候秦鳳路馬步軍副都總管經略招討副使徙永興路馬步軍副都指揮使并代州路副都總管安撫招討副使未幾守代州再徙真定路都總管保州兵叛殺官吏詔遣王果招降之叛者乘埤呼曰得李步軍來我降矣於是遣昭亮昭亮從輕騎數十人不持甲盾弓矢叩城門呼城上曰爾輩第來降我保其無虞也不爾幾無噍類矣卒稍稍縋城下明日相率開城門降改淮康軍節度觀察留後復知定州敕使存勞賜黃金三百兩給節度使奉以褒其功



都轉運使歐陽脩言昭亮入保州以叛卒女口分隸諸軍有輒私入其家者置不問明年拜武寧軍節度使代李用和爲殿前副都指揮使時承平久將士多因循樂縱弛昭亮本將家子雖以恩澤進然習軍中事既統宿衛政尚嚴多所建請萬勝龍猛軍蒲博爭勝負徹屋椽相擊士皆惶駭昭亮捕斬之杖其主者諸軍爲之股慄帝祠南郊有騎卒亡所挾弓會赦當釋去昭亮曰宿衛不謹不可貸卒配隸下軍禁兵自是頓肅以宣徽北院使判河陽徙延州以南院使判澶州徙并州成德軍拜同中書門下平章事判大名府仁宗以塗金紋羅書曰李昭亮親賢勳舊命其子惟賢持以賜徙定州改天平彰信泰寧軍節度使在定州數言老疾不任邊事願還京師乃以爲景靈宮使又改昭德軍節度使卒贈中書令諡良僖昭亮爲人和易練習近事於吏治頗通敏善委任僚佐以故數更藩鎮無他過昭亮妻早亡內嬖三妾迭預家政莫能制也子惟賢字寶臣以父蔭爲三班奉職後爲閣門祗候通事舍人累遷西上閣門使尋領高州刺史知莫州州倉粟陳腐戍兵大譟弗肯受州人皆恐惟賢馳往諭曰邊兵衆則積粟多廩數多且積久能無陳腐乎欲盡取新則陳者何所歸遂斬首惡一人



流十人軍中帖然召還提舉諸司庫務領榮州團練使  
知冀州會遷補禁軍自隸籍後犯贓汚者皆絀爲下軍  
惟賢曰武士何可責以廉節且抵罪在昔今不可以新  
令繩之帝爲更其制徒恩州後遷四方館使卒惟賢善  
宣辭令習朝儀仁宗頗愛之

李用和字審禮章懿皇太后弟也少窮困居京師鑿紙  
錢爲業劉美求用和於民間奏爲三班奉職累遷右侍  
禁閣門祇候權提點在京倉草場考城縣兵馬都監太  
后崩詔赴喪旣葬遷禮賓副使領入作司遷禮賓使同  
領皇城司遷崇儀使賀州刺史改葬太后于永安領樞

日天武兵護梓宮明年春又詔乘傳行太后陵還授寧  
州刺史歷遷澤州團練慶州防禦鄜州觀察使旣而擢  
殿前都虞候鄜延路馬步軍副都總管未行拜永清軍  
節度觀察留後改真定府定州路舊制刺史以上所賜  
公使錢得私入而用和悉用爲軍費歷侍衛親軍步軍  
馬軍副都指揮使拜建武軍節度使殿前副都指揮使  
以老乞罷軍職拜宣徽北院使逾月改彰信軍節度使  
同中書門下平章事景靈宮使以疾告仁宗臨問賜銀  
飾肩輿進兼侍中初未有居第詔寓館芳林園用和固  
辭又假以惠寧坊之官第病革帝入見臥內擢其次子



宋史卷四百五十五 五  
珣爲閣門使賜所居第并日給官舍餼錢五千旣卒帝  
哭之慟贈太師中書令隴西郡王輟朝五日制服禁中  
謚恭僖帝撰神道碑書曰親賢之碑其妻卒亦輟朝成  
服初仁宗以太后不逮養故外家褒寵特厚用和列位  
將相能小心靜默推遠權勢論者以此稱之子璋

璋字公明以章懿皇后恩補三班借職積官爲天平軍  
節度觀察留後知澶州護塞商胡會河漲訛言水且至  
璋據聽事自若人心乃安河亦不溢徙曹州觀察使累  
遷武勝軍節度使殿前都指揮使仁宗書忠孝李璋字  
并祕書賜之宴近臣羣玉殿酒半命大盞二飲韓琦及

璋如有所屬帝崩執政欲增京城甲士璋曰例出累代  
不宜輒易時禁衛相吉乾興故事內給食物中有金旣  
而果賜食衆視食中璋曰天子未臨政已優賞汝何功  
復云云敢誼者斬衆乃定以武成軍節度使知鄆州京  
東盜白日殺縣令略人道中璋信賞罰擒捕盜爲衰止  
歲大雨水競以船筏邀利多溺死者璋一切籍之約所  
勝載如黃河法發卒城州西關調夫脩路數十里夾道  
植柳人指爲李公柳知鄧州坐失舉改節振武軍知鄆  
州還朝道卒年五十三贈太尉謚曰良惠弟瑋珣  
瑋選尚亮國公主積官濮州團練使以樸陋與主不協



所生毋又忤主意主入訴禁中瑋皇恐自劾坐罰金後數年終不協主還宮瑋自安州觀察使降建州落駙馬都尉知衛州未幾主徙封岐國復瑋都尉主薨以奉主亡狀貶郴州團練使陳州安置遇赦還京師至建武軍節度使檢校大師卒哲宗臨奠哭之贈太師中書令瑯字公粹以蔭爲閣門祗候時兄瑋爲閣門副使瑯又求通事舍人仁宗曰爵賞所以與天下共也儻盡用親戚何以待勳舊乎後一年乃念之車駕視用和疾自西上閣門副使累遷均州防禦使知相州賜御製詩飛白字寵其行未幾遷相州觀察使時劉永年亦同除官知

制諾楊政以爲不可開僥倖之門詔他舍人草制御史范鎮復論之命遂寢使契丹預釣魚會獲多契丹遺以金器使還悉上之更賜黃金及李珣忠孝字熙寧中遷宣州觀察使知潁州哲宗初進泰寧軍留後提舉萬壽觀故事正任遇覃恩上移鎮唯宗室乃遷官至是珣與李端慤皆特遷戚里一覃恩遷官自此始復知相州卒年七十四

李遵勗字公武崇矩孫繼昌子也生數歲相者曰是當以姻戚貴少學騎射馳冰雪間馬逸墜崖下衆以爲死遵勗徐起亡恙也及長好爲文詞舉進士大中祥符間



召對便殿尚萬壽長公主初名勗帝益遵字升其行爲  
崇矩子授左龍武軍駙馬都尉賜第永寧里主下嫁而  
所居堂甃或瓦甃多爲鸞鳳狀遵勗令鑿去主服有龍  
飾悉屏藏之帝歎喜領澄州刺史坐私主乳母謫均州  
團練使徙蔡州踰年起爲太子左衛率府副率復左龍  
武軍將軍領宏州團練使真拜康州團練使給觀察使  
祿時繼昌官刺史遵勗請班其下許之後繼昌守涇州  
暴感風眩遵勗馳省不俟命帝遣使令乘驛赴之旣還  
上表自劾帝使輔臣慰諭之遷澤州防禦使又遷宣州  
觀察使求補郡自試出知澶州賜宴長春殿在郡會河  
水溢將壞浮梁遵勗督工徒七日而堤成遷昭德軍節  
度觀察留後拜寧國軍節度使徙鎮國軍知許州水軍  
多不練習而隸籍遵勗命部校按劾拔去十七八復以  
疾請援唐韋嗣立故事求山林號詔不許初天聖間章  
獻太后屏左右問曰人有何言遵勗不答太后固問之  
遵勗曰臣無他聞但人言天子旣冠太后宜以時還政  
太后曰我非戀此但帝少內侍多恐未能制之也嘗上  
三說五事以論時政晉國夫人林氏以太后乳母多干  
預國事太后崩遵勗密請置之別院出入伺察之以厭  
服衆論其補助居多類此所居第園池冠京城嗜奇石



募人載送有自千里至者構堂引水環以佳木延一時  
名士大夫與宴樂師楊億爲文億卒爲制服及知許州  
奠億之墓慟哭而返又與劉筠相友善筠卒存恤其家  
通釋氏學將死與浮圖楚圓爲偈頌卒贈中書令諡曰  
和文有問宴集二十卷外管芳題七卷子端懿

端懿字元伯性和厚喜問學頗通陰陽醫術星經地理  
之學七歲授如京副使侍真宗東宮充所親愛嘗解方  
玉帶賜之稍長出入宮禁如家人七遷濟州防禦使爲  
羣牧副使杜衍爲樞密擇外以子弟試外官廼以端懿  
知冀州爲政循法度民愛其不擾轉運使移州捕妖人

李教教已死恩州王則據城叛人有言教不死在賊軍  
中遂降單州團練使知均州改滑州兵馬鈐轄賊平實  
無李教者乃以爲汝州防禦使提舉在京諸司車務遷  
蔡州觀察使同勾當三班院徙華州觀察使以母喪起  
復爲鎮國軍節度觀察留後願終制許之仍給全奉服  
除提舉集禧觀出知鄆州兼京東西路安撫使是歲京  
東水民多饑大發倉廩以賑之置弓手局教以戰鬪遂  
如精兵治汶陽堤百餘里以却水患民便之尋除寧遠  
軍節度使知澶州御史中丞韓絳奏端懿無功不當得  
旄節不拜以留後赴澶州數月卒訃聞帝方宴禁中爲



徹樂贈其家黃金三百兩贈感德軍節度使諡良定再  
贈兼侍中端懿能自刻厲聞善士傾身下之以故士大  
夫與之遊甚得名譽弟端愿

端愿字公謹以穆獻公主恩七歲授如京副使四遷爲  
恩州團練使仁宗以歲旱御便殿慮囚放宮女端愿上  
疏請縱釋有罪小人之幸放宮女爲宦者專制反失所  
歸何以弭災變累進邢州觀察使鎮東軍留後知襄郢  
二州本路轉運使獻羨財數十萬被賞端愿言常賦三  
折其民不堪卽上其事帝怒奪轉運使賞申折變之禁  
移廬州富弼謂曰肥上之政何以減於襄陽端愿曰被

官喜事餽厨傳以干名則譽者至更事旣久知抑豪彊  
制猾吏故毀隨之弼深然其言英宗初同提舉在京諸  
司庫務帝以疾拱默端愿求對進曰陛下當躬攬權綱  
以係人心不宜退託失天下望拜武康軍節度使知相  
州請歸除醴泉觀使神宗卽位遣使就其家錄取異時  
章奏賜詔褒之河東城囉兀端愿手寫趙普諫太宗北  
伐疏以聞連年請老以太子少保致仕凡大禮成賜金  
帶器幣品數視執政哲宗嗣位進太子太保欽聖皇后  
以甥舅之故嘗幸其第致禮於獻穆祠堂命近侍掖端  
愿勿拜元祐六年卒帝輟朝臨奠賻典加等贈開府儀



同三司弟端慤子評

端慤字守道官左藏庫使執獻穆喪辭起復詔特給奉  
累遷東上閣門使幹辦三班院嘗侍宴羣玉殿仁宗獨  
賜珠花飛曰字寵顧特異知邢冀衛三州至蔡州觀察  
使元祐中以安德軍留後卒贈昭德軍節度使諡曰恭  
敏兄端懿在嘉祐時嘗密請建儲人無知者卒於澶淵  
端慤走護其喪以歸元豐間因進對袖舊橐上之神宗  
歎曰近世之賢戚也由是端慤之名益著

評字持正由東頭供奉官八遷皇城使以父告老授西  
上閣門使爲樞密都承旨出使陝西河東還言鄜延之  
人皆謂城囉兀非便乞速毀撤解一路之患師出安南  
調兵及河東又言王師南征而取卒於西北使蠻聞之  
得以窺我所論事頗多或見施行然天資刻薄招權不  
忌多布耳目采聽外事自效以爲忠僥倖進用中外及  
目以榮州刺史出知穎州還幹當三班院副韓縝報聘  
契丹且分畫河東地界凡二年乃決賜袍帶金帛以賞  
勞進成州團練使知蔡州卒年五十二贈冀州觀察使  
賜白金千兩評少涉書傳嘗以公主遺奏召試學士院  
改殿中丞意不滿辭之後二年再召試復止遷一官愈  
不悅至上書辨論及卒人無憐者



曹侂字公伯韓王彬之孫慈聖光憲皇后弟也性和易  
美儀度通音律善奕射喜爲詩自右班殿直累進殿前  
都虞候安化軍留後言者謂年未四十毋典軍出知澶  
青許三州徙河陽以建武軍節度使爲宣徽北院使知  
鄆州改保靜保平軍節度使同中書門下平章事景靈  
宮使加兼侍中封濟陽郡王神宗每咨訪以政然退朝  
終日語不及公事帝謂大臣曰曹王雖用近親貴而端  
拱寡過善自保真純臣也進對未嘗名元豐中以疾告  
旣愈入謝帝曰舅久不覲太皇太后宜少憇內東門朕  
當自啓已而召入歷上下儒釋道五閣大椿蟠桃亭再

升殿乃退以護國軍節度使司徒兼中書令爲太一宮  
使給朱衣雙引騎吏前馬慈聖喪終請郡帝曰時見舅  
如面慶壽宮柰何欲遠朕得無禮遇有不至乎侂惶恐  
卽城南爲園池給八作兵屯役疏惠民河水灌之且將  
爲築三百楹第固辭乃止高麗獻玉帶爲秋蘆白鷺紋  
極精巧詔後苑工以黃金做其製爲帶賜侂生日賚予  
如宰相親王用教坊樂工服色衣侂酒以示尊寵哲宗  
卽位加少保坤成節獻壽特綴宰相班優詔減拜卒年  
七十二贈太師追封沂王從弟偕子評誘

偕字光道少讀書知義以節俠自喜爲許州都監幕客



史沆傾險劫持爲不法上下畏之偕從容置酒對客數  
沆十罪將擊殺之沆起拜謝偕罵曰復不改必殺汝沆  
爲歛迹累遷東上閣門使帶御器械知雄州議者欲廢  
塘灤爲田偕曰何承矩李允則營此累年所以限契丹  
廢之不可進華州防禦使知相州徙河陽總管卒嘗從  
梅堯臣學詩堯臣稱之爲序其詩

評字公正以父任累官至引進使知審官西院積遷溫  
州防禦使元祐中提舉萬壽觀丐外樞密院白爲真定  
路鈐轄哲宗曰先帝待慈聖家極厚其以爲總管徽宗  
卽位遷相州觀察使歷龍神衛捧日天武都指揮使殿

前都虞候馬步軍副都指揮使寧遠軍留後平海軍節  
度使佑神觀使使契丹者四館伴者十二在閣門十二  
年預脩儀制多所增損性喜文史書有楷法慈聖命書  
屏以奉神宗卽賜玉帶旌其能尤善射左右手如一夜  
或滅燭能中伴契丹使者射嘗雙破的客驚竦在戚里  
號爲湛厚卒年六十六贈開府儀同三司

誘字公善以蔭至左藏庫副使熙寧中父侑以疾告入  
謝神宗面授誘閣門通事舍人元祐中以東上閣門使  
爲真定府定州路兵馬鈐轄遷文州刺史使契丹至其  
宮門館客者下馬邀誘同人誘曰北朝使至及朝堂門



兩朝積好又無妄生事卒乘馬入使還爲樞密副都承  
旨徽宗時進都承旨歷慶州團練恩州防禦晉州觀察  
使保慶軍留後大觀中進安德軍節度使醴泉觀使與  
兄評同日拜立雙節堂於家戚里榮之性謹密習熟典  
故卒年六十五贈開府儀同三司諡曰忠定

高遵裕字公綽忠武軍節度使瓊之孫也以父任累遷  
供備庫副使鎮戎軍駐泊都監夏人寇大順城諒祚中  
矢遁會英宗宴駕遣遵裕告哀抵宥州下宮夏人遣王  
盟受命以吉服至遵裕切責之遂易服旣而具食上宮  
語及大順城事盟曰剽掠軍耳遵裕曰若主寇邊扶傷

而遁斯言非妄邪夏人以爲辱亟遣人代對終食不敢  
發口輒忿怒曰王人蔑視下國弊邑雖小控弦十數萬  
亦能躬執橐鞬與君周旋遵裕瞋目曰主上天縱神武  
毋肆狂蹶以干誅夷時諒祚覘於屏間搖手使止神宗  
聞而嘉之擢知保安軍橫山豪欲向化帝使遵裕諭种  
諤圖之諤遂取綏州帥怒諤擅發兵欲正軍法諤懼稱  
得密旨於遵裕故諤被罪遵裕亦降爲乾州都監遷通  
事舍人主管西路羗部駐古渭砦分所部羗兵爲三等  
教以軍法熙寧初朝廷用王韶復洮隴命爲秦鳳路沿  
邊安撫以遵裕副之尋以古渭爲通遠軍命知軍事明



年持附順羗部圖籍及繪青唐武勝形勢入獻擢引進副使帶御器械俾歸治師師次慶平堡夜行晨至野人關羗人旅拒引親兵一鼓破之進營武勝城下羗衆逃去遂據其城詔建爲鎮洮軍又命知軍事尋以熙河洮岷遠通爲一路進西上閣門使榮州刺史充總管復知通遠軍明年詔欲取河州遵裕曰古謂舉事先建堡砦以漸而進故一舉拔武勝今兵與糧未備一旦越數舍圖人之地使彼阻要害我軍進退無所矣詔與李憲笑曰君何遠相異邪檄使守臨洮詔攻河州果不克帝善其議令專管洮岷疊巖未款附者遵裕以逾龍珂地有鹽井遂築鹽川砦瞎吳叱率諸羗脅青唐欲擾邊詔遣張王攻討遵裕曰青唐無罪第爲生羗所脅耳遣裨將與龍珂率衆禦之青唐人見龍珂泣訴瞎吳叱知不附已潰去從詔取岷州下之令士衆曰生獲老幼與得級同全活者以數萬捷聞加岷州刺史明年羗乘景思立之敗圍河岷二州道路不通者幾月或請退保遵裕曰敢議此者斬岷城軍缺守者恐遵裕登西門命將縱擊別選精騎繇南門譟而出合擊之羗敗走時朝廷以岷城遠難守議棄之詔至賊已潰矣以功進團練使龍神衛都指揮使知熙州坐薦張穆之爲轉運使而穆之



有罪罷知潁州未幾徙慶州又坐事黜知淮陽軍元豐四年復知慶州詔與諸路討夏國請濟師得東兵十一將騎不足用以羣牧馬益之又令節制涇原兵劉昌祚先至靈州幾得城遵裕嫉之故不用其計遂以潰歸語在昌祚傳貶郢州團練副使哲宗卽位復右屯衛將軍主管中嶽廟卒年六十贈永州團練使紹聖中崇贈奉國軍節度觀察留後從弟遵惠

遵惠字子育以蔭爲供奉官熙寧中試經義中選換大理評事歷三班院主簿軍器丞元祐初上疏言法度之廢事有當否如先帝所施設未可輕議擢太僕少卿上

太府卿出知河中府改河北路都轉運使未行拜工部侍郎以集賢殿脩撰知鄆州河南潁昌府加寶文閣待制知成德軍召爲戶部侍郎以龍圖閣學士知慶州卒年五十八贈樞密直學士方宣仁后臨朝繩檢族人一以法度乃舉家事付遵惠遵惠躬表率之人無間言亦能遠嫌自保故不罹紹聖之禍從姪士林

士林字才卿宣仁聖烈皇后之弟也累官內殿崇班殿直英宗書謹守法律四字誨之曰能此則爲良吏矣每欲進擢后屢辭輒止喜儒學涉閱經史通大義尤有巧智嘗監揚州召伯牒稅木舊用火印士林改刃其印文



鑿以爲識尤簡便傍郡皆效焉卒贈德州刺史神宗立  
加贈昭德軍節度使紹興初追封普安郡王子公紀  
公紀字君正歷閤門祗候通事舍人累進寧州刺史團  
練使永州防禦使集慶留後性儉約珍異聲伎無所好  
奉祿多以給諸族得任子恩均及孤遠持宣仁后喪未  
終卒贈感德軍節度使諡曰懷僖紹興初追封新興郡  
王子世則

世則字仲貽幼以恩補左班殿直至內殿崇班復用父  
遺表恩爲閤門祗候後除親衛郎以通經典轉內殿承  
制累遷康州防禦使知西上閤門事宜和末金泛

徽宗命世則掌客世則記問該洽應對有據帝聞悅之  
自是掌客多命世則金人軍城下又命世則使其軍還  
進秩二等遷知東上閤門使金遣燕人吳孝民請和孝  
民邀宰執親王詣軍前議事高宗在康邸請行是日世  
則入對遂除計議副使以從康王復使河北世則改華  
州觀察使充參議官召對賜金帶高宗艱難中世則  
嘗在左右寢處不少離大元帥府建炎元帥府參議官  
因請布檄諸路以定人心進遙郡承宣使不拜高宗承  
制轉越州觀察使及卽位除保靜軍承宣使提舉萬壽  
觀詔令編類元帥府事迹付史館召爲樞密都承旨兼



提舉京畿監牧再提舉萬壽觀世則居温州帝遣中使諭守臣以時給奉祿凡積二萬緡因請以裨郡費常病瘍艱於據鞍又以舊所御肩輿賜焉帝每念宣仁聖烈皇后保祐三朝中遭誣詆外家班秩無顯者制以爲感德軍節度使充萬壽觀使進開府儀同三司奉朝請賜第臨安涂景靈宮使兼判温州尋以病丐罷後爲萬壽觀使十四年召入覲進少保懇求還卒年六十五贈太傅賜田三十頃諡曰忠節

向傳範字仲模尚書左僕射敏中之子以父任爲衛尉丞娶南陽郡王惟吉女改內殿崇崇班帶御器械歷知相

恩邢三州入管幹客省閣門皇城司知陝州仁宗賜詩以寵其行熙寧初知鄆州兼京西路安撫使諫官楊繪言傳範領安撫使無以杜外戚僥求之源樞密使文彥博曰傳範累典郡非緣外戚神宗曰得諫官如此言甚善可以止他日妄求者以密州觀察使卒贈昭德軍節度使諡曰惠節傳範宰相子聯戚里所至有能稱以橐中貲千餘萬葬族人在殯者六十四喪從姪經綜經字審禮以蔭至虞部員外郎神宗爲穎王選經女爲妃改莊宅使帝卽位妃爲皇后進光州團練使以濰州防禦使知陳州歲中閱囚活重辟三人西華令掠人至



死誣以疾吏畏令莫敢言經得其情卒窮治如法歲大雪輒弛公私徧錢以寬民有司持不可經曰上使我守陳民窮蓋我責我自爲此不爾累也方鎮別賜公使錢例私以自奉去則盡入其餘經獨斥歸有司唯以供享勞賓客軍師之用知河陽會旱蝗民乏食經度官廩歲用無餘乃先以圭田租入振救之富人爭出粟多所濟活徙徐州遷明州觀察使召還提舉景靈宮進定國軍留後復出知青州旣行官給車徒三官皆遣使送之車馬相屬於道未踰歲得疾還卒于淄州年五十四詔內侍迎其喪皇后出哭于新昌第喪至慶壽寶慈宮交遣謫者予駁后臨于國門之外贈侍中謚曰康懿將葬遣近臣典護穿復土給太常鹵簿帝出郊奠之周視其柩葬三日后臨于墓下賜篆碑首曰忠勤懿威經所至勤吏治事皆自省決頗欲以才見於用故數請外補嘗因太祖忌日百官班開元殿下后召經見行懽勉以盡忠朝廷經亦以善事三宮爲言不及其家事子宗回宗良綜字君章知歙縣籍閭里惡少年有盜發用以推迹輒得通判桂州常州知隨鼎漳汾密棣沂七州沂阻山多盜綜請用重法繩禁歲斷大辟減半兵又情會初置官提舉教之急衆不悅監兵夜排闥告變綜疑有他謀就



寢自若明日大閱申嚴號令賞其高彊罰其不進者卒亦無事性寬裕善治劇於姦惡不少恕官累中散大夫卒

宗回字子發累官相州觀察使徽宗立進彰德軍留後歷安國保信鎮南保平軍節度使檢校司空封永陽寧海安康漢東郡王開府儀同三司崇寧初有告其陰事者詔開封府鞫實御史中丞吳執中臨問宗回惶懼上還印綬以太子少保致仕言者不已削官爵流郴州行二日聽家居省咎諭年盡還其故官宗回少驕恣有小才嘗權羣牧都監數以蕃息被賞出知蔡州擒劇賊嚴

其黨類歲饑發廩興力役饑者得濟而官舍幣庫一新  
欽聖后服除起奉朝請繼命止朝朔望卒年六十二帝制服苑中贈檢校少師諡曰榮縱

宗良字景弼歷秀州刺史利州觀察使昭信軍留後奉國清海鎮東武寧寧海軍節度使永嘉郡王開府儀同三司欽聖后臨朝時嘗爲陳瓘論其與蔡京相結及預政事亦能恪共自守宣和中卒年六十六贈少保

張敦禮熙寧元年選尚英宗女祁國長公主授左衛將軍駙馬都尉遷密州觀察使元祐初疏言變法易令始於王安石成於蔡確近者退確進司馬光以臣觀之所



得多矣進武勝軍留後章惇爲政言敦禮忘德犯分醜  
正朋邪密封章疏詆毀先烈引譽罪首謂當褒崇欲其  
黨儔盡見收用乃責授左千牛衛大將軍勒止朝參微  
宗立有司以敦禮在貴籍奏審恩賜帝與欽聖后皆以  
爲當與惇等執前疏欽聖曰戚里何必預知朝廷事當  
時罰亦太重矣復和州防禦使進保信軍留後崇寧初  
拜寧遠軍節度使諫官王能甫言敦禮以匹夫之賤一  
日而富貴具焉神宗親愛隆厚禮遇優渥而敦禮詆毀  
盛德罪大謫輕今復與之節鉞無乃傷陛下紹述之志  
乎乃奪節仍爲集慶軍留後大觀初復節度寧遠軍徙

雄武卒贈開府儀同三司

任澤字天錫仙遊夫人母弟也英宗入繼大統召至延  
和殿授西頭供奉官賜第一區寵眷甚厚神宗時累遷  
皇城使領昌州刺史護仙遊柩遷柩于濮園眞拜嘉州  
刺史卒贈崇信軍節度使諡曰恭僖賜墓寺寺額爲旌  
孝澤起田里際會恩寵能自安繩檢帝欲廣其居固辭  
當任子弗請其篤謹如此



宋史卷四百六十四終

宋史卷四百六十五

列傳第二百二十四

開府儀同三司上柱國錄軍國重事前中書右丞相監樞密院事都總裁脫脫

皇明朝列大夫國子監祭酒臣方從哲

承德郎右春坊右庶子國子監司業事臣黃汝良等奉

勅重校刊

外戚下

孟忠厚

韋淵

錢忱

邢煥

潘永思

吳益弟

李道

鄭興裔

楊次山

孟忠厚字仁仲隆祐太后兄追封咸寧郡王彥弼子也

萬曆二十七年刊



后退居瑤華宮哲宗恩眷不衰故忠厚得以仕進宣和中官至將作少監靖康元年知海州召權衛尉卿金人圍城后宮火出居忠厚家繇是免北遷金兵退張邦昌迎后聽政后遣忠厚持書遺康王王卽位將迎后授忠厚徽猷閣待制提舉一行事務尋兼幹辦奉迎太廟祥主事帝幸揚州除顯謨閣直學士臺諫交章論列帝以太后故難之后聞卽命易武秩遂授常德軍承宣使幹辦皇城司未幾奉太后幸杭州苗傅亂平趙鼎謂張浚曰太后復辟其功甚大當推恩外家浚乃奏忠厚寧遠軍節度使尋奉太后幸南昌歸至越以母憂解職頃之

后崩以祔廟恩起復鎮海軍節度使開府儀同三司及后大祥封信安郡王充禮儀使奉太后神御幸温州紹興九年判鎮江府改判明州兼安撫使改判婺州旣而帝以大后攢會稽乃命忠厚判紹興府兼脩奉攢官事加少保三梓官歸充迎護使及營佑陵秦檜當爲總護使憚往乃除忠厚樞密使以代其行檜與忠厚僚壻也然心實忌之山陵事畢忠厚欲歸樞密府檜諷言路引故事論列遂判福州時海寇猖獗帝憂忠厚不能弭其患改判建康府又改判紹興府會郊赦加恩謝表有本無時才出爲世用語中丞詹大方希檜意論忠厚表辭



輕侮謂今日不足與有爲遂罷爲醴泉觀使檜死召還  
行在授保寧軍節度使判平江府再改判紹興府適闕  
入見復詔充萬壽觀使提舉秘書省二十七年卒贈太  
保忠厚奉昭聖太后訓避遠權勢不敢以私干朝廷明  
受之變太后垂簾忠厚乞裁節本家恩澤如有黃緣令  
三省執奏御史劾秦檜當國親姻扳援以進忠厚獨與  
之忤自越入見語所善王銍曰忠厚與檜雖有親好每  
懷疑心今欲求一不傷時忌對劄銍教之但言乞免提  
舉學事而已然亦見廢帝以太后擁佑功故眷忠厚特  
優后在瑤華三十年恩澤未嘗陳請詔賜忠厚田三十  
頃以賞之既奉內祠金使至特命押班且令月過局如  
宰執例及卒三子皆除直秘閣親屬六人各進以一官  
韋淵顯仁太后季弟也靖康末官至拱衛大夫忠州防  
禦使勾當軍頭引見司金人退張邦昌遣淵持書遺康  
王子濟南王卽位遷親衛大夫寧州觀察使知東上閣  
門事言橫行五司尙未遵元豐舊制乞併引進司歸客  
省東西上閣門合而爲一以省冗費從之遂命同管客  
省四方館閣門事淵性暴橫不循法度帝慮其有過難  
於行法遂遷福建路副總管淵引疾丐祠許之淵乃言  
自宣和及今十二年未嘗磨勘乞遷秩吏部言在法橫



行無以年勞磨勘者帝遂不許久之落階官除德慶軍節度使召赴行在除開府儀同三司會建康軍帥邊順疾篤留守呂願浩奏以淵代帝不欲以戚里管軍不許淵陳乞恩數帝詢太后家故例賜田五十頃房緡錢日二十千帝久不予淵官聞太后將入境乃封平樂郡王令逾于境上既從后歸卽令致仕又詔奉朝請遷少師淵在內不得逞乞致仕任便居住從之未幾帝恐其肆橫於外復詔落致仕還居賜第太后朝景靈宮淵見后出言詆毀詔侍御史余堯弼卽其家鞫治淵具狀誣罔責授寧遠軍節度副使袁州安置數年復故職累遷太

保太傅卒贈太師子二人訛謙謙訛紹興中官至達州刺史坐過用太后旨降武德郎與嶺外監當謙好學能詩官至建康軍節度使謙子璞淳熙末仕至太府少卿高宗崩擢司農少卿爲金國告哀使金主錫宴其館使欲用樂璞不可自朝至夜漏下三十刻金人不能奪及入見其閣門令璞吉服入璞又不可日將中乃以凶服見紹熙初除煥章閣論者以爲非祖宗舊制遂換授明州觀察使十年不遷寧宗嘉其恬退授清遠軍節度使致仕卒贈太尉

錢忱字伯誠吳越王俶五世孫父景臻尙仁宗第十女



秦魯國大長公主生忱神宗命賜名除莊宅副使騎都尉帝嘗諭景臻曰主賢宜有子為擇嘉配娶唐介孫女又晁迴外孫忱從二家遊伯父勰在翰苑因得識一時名卿哲宗愛之常使侍左右徽宗單八寶恩為邕州觀察使遷武寧軍觀察留後喜其靖共除瀘州軍節度使欽宗加檢校少保尋納節高宗立復拜檢校少保瀘州節度使中太一宮使御書忠孝之家四字賜之進開府儀同三司紹興十五年以秦魯主終喪除少保封榮國公三十年遷少師仍舊節致仕給真奉明年卒年八十餘贈太師子端禮自有傳

邢煥字文仲開封人以父任調孟州汜水縣主簿監在京藥局平準務茶場以勞改宣德郎莫州司錄移知開封府陽武縣都大提舉開德大名府堤埽歷開封府七十年儀曹詔納其女為康王妃靖康初主管亳州明道宮王卽位升右文殿脩撰進徽猷閣待制諫議大夫衛膚敏言后父不當班從臣遂改光州觀察使除樞密都承旨煥屢奏馬傳言事切當宗澤忠勞可倚黃潛善汪伯彥誤國其言多所裨益遷保靜軍承宣使苗劉之變煥自度不能爭迺病免兼提舉萬壽觀求去不已改江州太平觀遂徙居忠州紹興二年入對首陳川陝形勢利



害請幸荆南分兵以圖恢復凡數百言帝甚嘉之復以爲都承旨引疾不拜擢慶遠軍節度使提舉洞霄宮煥涉學有文節儉自持未嘗恃恩私請識者取焉是年卒贈開府儀同三司謚恭簡加贈少師追封嘉國公

潘未思賢妃叔父也妃初進封詔以梁師成第賜未思建炎初爲閤門宣贊舍人帶御器械元祐太后在虔帝遣未思迎歸權三省樞密事盧益頗與之交結爲諫官吳表臣所論范宗尹請出未思帝曰未可姑罷祿以困之庶知悔過遂奪職旣而辛企宗言未思嘗捕魔賊有功復爲帶御器械未幾大理推治僞告事連未思帝曰未思雖戚里旣有過安可廢法乃罷職就逮獄成追一官尋復爲閤門宣贊舍人遷同知閤門事未思乞增給殮錢戶部言其不應格法乃止紹興八年自右武郎擢右武大夫知閤門事尋卒

吳益字叔謙蓋字叔平俱憲聖皇后弟也益建炎未以恩補官累遷幹辦御輦院帶御器械蓋紹興五年以恩法亦有書名后受冊推恩益加成州團練使蓋加文州刺史帝爲置皇后宅大小學教授以王鑑爲之鑑明經善訓導益蓋折節事之益娶秦檜長孫女又與王繼先



交相薦引故三家姻族皆躡美官益歷官至保康軍節度使加太尉儀同三司初既建節以檜故授文資直秘閣檜進徽宗御製辭免加恩帝乃特命賜益三品服累加秘閣脩模直徽猷閣以檜提舉編脩寬恤詔令又加益直寶文閣檜死其子煇復請於帝又升敷文閣待制中丞湯鵬舉言益以庸瑣之才特親昵之勢乞褫職名以示至公帝謂鵬舉所論甚切當然朕於奠檜日諭檜妻子許以保全其家今若遽出其壻則傷恩臣僚無得更有論列自是不復遷顯仁太后葬爲攢宮總護使始進少保孝宗嗣位進少傅又進太師封太寧郡王乾道七年卒年四十八諡莊簡追封衛王蓋官至武寧軍節度使亦累升大尉開府儀同三司少保封新興郡王乾道二年卒年四十二贈太傅追封鄭王益子琚習吏事乾道九年特授添差臨安府通判其後歷尚書郎部使者換資至鎮安軍節度使復以才選除知明州兼沿海制置使寧宗初乃得祠奉朝請尋知鄂州再知慶元府位至少師判建康府兼留守卒方孝宗崩光宗以疾不能執喪大臣請太后垂簾冊立寧宗琚言於后曰垂簾可暫不可久后遂以翌日徹簾琚嘗使金人嘉其信義琚死後宋遣使至金議和屢不合金人言南使中惟



吳琚言爲可信琚弟壽仕至保靜軍節度使蓋子環亦至昭化軍節度使

李道字行之相州人其中女爲光宗后初道與兄旺聚衆歸宗澤澤因事斬旺命道掌其軍澤薨道引軍依襄陽鎮撫使桑仲仲以爲副都統制兼知隨州奏于朝授武義郎閤門宣贊舍人仲爲霍明所殺道與統制李橫率兵縞素圍明于郢明亡去劉豫遣人持書招道道不從執其使以聞詔嘉獎之豫怒遣將穆楷攻道道拒破之除鄧隨州鎮撫使兼知鄧州時李橫已命別將守鄧道憚橫不敢受遂命仍知隨州樞密院以道能察軍情

不受鎮撫之命理宜褒賞詔領榮州團練使進武義大夫胡安中守唐州勢孤不能自立遂附豫道招之安中復來歸會李成入寇鎮撫使李橫棄襄陽去道亦棄隨南歸至江州詔道屬岳飛爲選鋒軍統制入唐州擒僞將除唐鄧郢州襄陽都統制從飛收復襄陽等郡授行營護軍累至復州防禦使果州觀察使戍鄂州加中侍大夫武勝軍承宣使又升御前諸軍統制武興蠻楊再興連歲寇掠道破其衆擒再興及其二子遷保寧軍承宣使羣盜朱持等聚桂陽詔道移軍衡州經理道遣高仲等擊平之落階官加龍神衛四廂都指揮使遷鎮南



軍承宣使金將渝盟命道以所部戍荆南府帥臣劉錡奏改爲御前前軍右軍就命道統之錡召奏事道代爲御前諸軍都統制金將劉士萼屯光化境道掩擊焚其舟萼遂遁去尋因大將言道與鄂帥不協罷踰年起授捧日天武四廂都指揮使知荆南府隆興初湖北諸司劾其過帝曰道恃戚里妄作可罷久之再爲湖北副總管及卒乃拜慶遠軍節度使贈太尉諡忠毅后既貴進封楚王孫孝友孝純皆至節度使

鄭興裔字光錫初名興宗顯肅皇后外家二世孫也曾祖紳封樂平郡王祖留共之陸海軍節度使父蕃和州防

禦使興裔早孤叔父藻以子字之分以餘貲興裔不受請立義莊贍宗族及藻沒遂解官致追報之義初以后恩授成忠郎充幹辦祇候庫聖獻后葬充攢宮內外巡檢累至江東路鈐轄乾道初建康留司請治行宮備巡幸興裔奏勞人費財乞罷其役且言都統及馬軍帥皆非其人徙福建路兵馬鈐轄過闕入見詢以守令臧否興裔條析以對帝曰卿識時務習吏事行當用卿會復置武臣提刑就命爲之加遙領高州刺史郡縣積玩檢驗法廢興裔劾爲格目分畀屬縣吏不得行其姦因著爲令建劔汀邵鹽筴屢更漕臣請易綱運爲鈔法興裔



極言其不可海寇倏去忽來調兵常無及興裔請置澳  
長寇至徑率民兵禦之又言禁兵事藝不精多充私役  
乞行禁止尉以捕盜改秩多僞當加審實帝善其數論  
事詔加成州團練使時傳聞金欲敗盟召興裔為賀生  
辰使以覘之使還言無他卒如所料累差浙東浙西江  
東提刑請祠以歸尋詔知閤門事兼幹辦皇城司又兼  
樞密副都承旨軍婦楊殺鄰舍兒取其臂釧而棄其屍  
獄成刑部以無證左出之命興裔覆治得實帝喜賜居  
第丁母憂去官服闋復故職除均州防禦使再使金還  
遷潭州觀察使復請祠起知廬州移知揚州楊與廬為

隣初興裔在廬嘗言部鄰道互送禮至是按郡籍見前所  
卻者有出無歸遂奏嚴其禁揚有重屯糧乏例糴他境  
興裔搜括滲漏以補之食遂足民舊皆茅舍易焚興裔  
貸之錢命易以瓦自是火患乃息又奏免其償民甚德  
之脩學宮立義塚定部轄民兵升差法郡以大治楚州  
議改築城有謂韓世忠遺基不可易者命興裔往視既  
至闕地丈餘增築之帝閱奏喜曰興裔不吾欺也紹興  
元年遷保靜軍承宣使召領內祠充明堂大禮都大主  
管大內公事寧宗卽位除知明州兼沿海制置使告老  
授武泰軍節度使卒年七十四贈太尉諡忠肅興裔歷



事四朝以材名結主知中興外族之賢未有其比子三人挺以橫行團練使歷淮襄兩道帥損登進士甲科與抗皆有位于朝

楊次山字仲甫恭聖仁烈皇后兄也其先開封人曾祖全以材武奮靖康末捍京城死事祖漸以遺澤補官仕東南家于越之上虞次山儀狀魁偉少好學能文補右學生后受職宮中次山遂霑恩得官積階至武德郎后爲貴妃累遷帶御器械知閣門事丐祠除吉州刺史提舉佑神觀后受冊除福州觀察使尋拜岳陽軍節度使后謁家廟加太尉韓侂胄誅加開府儀同三司尋進少

保封永陽郡王南郊恩加少傅充萬壽觀使致仕加大保授安德軍昭慶軍節度使改封會稽郡王次山能避權勢不預國事時論賢之嘉定十二年卒年八十一贈太師追封冀王子二人谷至太傅保寧軍節度使充萬壽觀使未寧郡王石字介之乾道間入武學以恭聖仁烈后貴賜第慶元中補承信郎差充閣門看班祇候尋帶御器械嘉泰四年充賀正旦接伴使時金使頗驕倨自矜其善射石從容起挽弦三發三中的金使氣沮嘉定改元除揚州觀察使知閣門事進保寧承宣使久之授保寧節度使提舉萬壽觀奉朝請進封信安郡侯十



五年以檢校少保進封開國公宣宗崩宰相史彌遠謀廢皇子竑而立成國公昀命石與谷白后后不可曰皇子先帝所立豈敢擅變谷石凡一夜七往反以告后終不聽谷等拜泣曰內外軍民皆已歸心苟不從禍變必生則楊氏且無噍類矣后默然良久曰其人安在彌遠等召昀入遂矯詔廢竑爲濟王立昀是爲理宗授開府儀同三司充萬壽觀使時寶慶垂簾人多言本朝世有母后之聖石獨曰事豈容槩言昔仁宗英宗哲宗嗣位或尚在幼冲或素繇撫育軍國重事有所未諳則母后臨朝宜也今主上熟知民事天下悅服雖聖孝天通然不蚤復政得無基小人離間之嫌乎乃密疏章獻慈聖宣仁所以臨朝之由遠及漢唐母后臨朝稱制得失上之后覽奏卽命擇日徹簾進石少保封永宣郡王以壽明慈睿仁福三冊太后寶進至太傅石性恬澹每拜爵命必力辭恭聖祔廟除太師兄谷疑於辭受石力言曰吾家非有元勳盛德徒以恭聖故致貴顯曩吾父不居是官吾兄弟今偃然受之是將自速顛覆耳矧恭聖抑遠族屬意慮深遠言猶在耳何可遽忘乃合疏懇辭至再三不受及屬疾除彰德集慶節度使進封魏郡王卒年七十一贈太師



宋史卷四百六十五終

宋史卷四百六十六

列傳第二百二十五

開府儀同三司柱國錄軍國重事尚書右丞相監脩國史領經筵事都總裁脫脫等脩

皇明朝列大夫國子監祭酒臣方從哲

承德郎奉直中允管國子監司業臣黃汝良等奉

勅重校刊

宦者一

竇神寶

王仁睿

王繼恩

李神福

弟祐

劉承規

閻承翰

秦翰

周懷政

張崇貴

張繼能

衛紹欽

石知顥

孫全

鄧守恩

萬曆二十七年刊

宋史卷四百六十六

列傳

一



宋世待宦者甚嚴太祖初定天下掖庭給事不過五十人宦寺中年方許養子爲後又詔臣僚家母私蓄閹人民間有閹童孺爲貨鬻者誦死去唐未遠有所懲也厥後太宗却宰相之請不授工繼恩宣徽真宗欲以劉承規爲節度使宰相持不可而止中更主幼母后聽政者凡三朝在於前代豈非宦者用事之秋乎祖宗之法嚴宰相之權重貂璫有懷姦恣旋踵屏除君臣相與防微杜漸之慮深矣然而宣政間童貫梁師成之禍亦豈細哉南渡苗劉之途亦宦者所激也坊記曰君子之道辟則坊與大爲之坊民猶踰之可不戒哉作宦者傳

實神寶父思儼五代時爲內侍宋初皇城使兄神興左領軍衛大將軍致仕神寶具私爲黃門太平興國中從征大原擐甲登城中流矢如雨遷入內高品監并州戍兵屢出襲賊前後破砦三十六斬千餘級大獲鎧甲牛馬橐駝因築三砦詔壞之九年命與尹憲屯夏州時岌伽羅膩等十四族又叛神寶率兵大破之焚其廬帳斬千餘級虜獲甚衆雍熙中朝廷遣使綏宥麟府州募邊部願攻契丹者賜以金帛神寶上言狼子野心由此或生邊隙乃止俄轉殿頭高品淳化中使河東閱視堡柵兵騎慕容德豐自刑臺徙延州未至郡詔神寶乘傳權州事



環州近邊內擾與陳德玄討之破牛家族二十八部且  
規度通遠入靈武路就命環慶同駐泊牛家族復結衆  
叛又破之殲餘黨於極泉鎮獲其渠帥九人西戎寇鄜  
以援之之勞遷供奉官與田紹斌部送靈州芻糧卽命  
駐泊李繼遷入寇與慕容德豐襲破其堡砦焚帳幕獲  
人畜數萬計連詔嘉獎遷內殿崇班至道初繼遷再寇  
靈武神寶遣人間道告急關下賊圍之歲餘地震二百  
餘日城中糧糗皆竭潛遣人市糴河外宵運以入聞出  
兵擊賊賊引去以功拜西京作坊副使又命于蒲洛河  
清遠軍援芻糧與楊允恭議起小車三千運糧至環州

二年遷西京左藏庫副使出使靈武還奏對稱旨面授  
供備庫使咸平中出爲高陽關鈐轄徙貝冀巡檢會原  
州野狸族三千餘衆徙帳于順成谷大蟲堪與熟魏族  
接戰詔神寶和治之至則定其經界遣悉還舊地入爲  
內侍右班副都知真宗朝陵留與劉承珪同掌大內事  
大中祥符初勾當三班院又掌諸王宮事遷西京左藏  
庫使領密州敕史兼掌往來國信神寶莅職精恪性吝  
嗇畜貨鉅萬天禧初以皇城使罷內職三年卒年七十  
一錄其子守志爲入內供奉官

王仁賡不知何許人年十餘歲事太宗于晉邸服勤左



右甚淳謹及卽位宣傳指揮頗稱旨歷入內小底都知  
洛苑副使命典宮闈出納之命最居親近嘗與柴禹錫  
等發秦邸陰事雍熙四年被疾遣太醫診視卒年四十  
一特贈內侍省內侍國朝以來內侍都知押班不領他  
職淳化至道後皆內殿崇班以上兼充多至諸司使有  
領觀察使者沒皆有贈官官給葬事舊制內侍人許養  
一子以充繼嗣開寶四年以其爭財起訟詔自今滿三  
十無養父者始聽養子仍以其名上宣徽院違者準前  
詔抵死咸平中徐志通爲溫台等州巡檢坐取李歡男  
四人爲假子又縱卒略民家小兒致其母抱兒投海死  
決杖配掃灑班復申前詔以戒厲之

王繼恩陝州陝人周顯德中爲內班高品初養於張氏  
名德鈞開寶中求復本宗太祖召見許之因賜名焉累  
爲內侍行首會計江南與竇神興等部禁兵及戰船抵  
采石九年春改裏面內班小底都知賜金紫十月加武  
德使太祖崩副杜彥圭案行陵地尋充未昌陵使太平  
興國三年遷宮苑使久之領河州刺史掌軍器弓槍庫  
雍熙中主師克雲朔命繼恩率師屯易州又爲天雄軍  
駐泊都監自岐溝關君子館敗績之後河朔諸路爲契  
丹所擾城壘多圯四年詔繼恩與翟守素田仁朗郭延



濟分路按行增築之及遣將北伐又爲排陣都監屯中  
山改皇城使端拱初領本州團練使又爲鎮定高陽關  
兩路排陣鈐轄淳化初賜甲第一區五年加昭宣使勾  
當皇城司李順亂成都命爲劔南兩川招安使率兵討  
之軍事委其制置不從中覆管內諸州繫囚非十惡正  
賊悉得以便宜決遣二月命馬步軍都軍頭王杲趣劔  
門崇儀使尹元由峽路分遣討賊並受繼恩節度詔前  
軍所至其賊黨敢抗王師者卽須殺戮如本非同惡受  
制兇徒先被脅從今能歸順者悉釋其罪四月繼恩由  
小劔門路入研石砦破賊斬首五百級逐北過青疆嶺  
平劔州進破賊五千于柳池驛斬千六百級賊衆望風  
奔走殺戮溺死者不可勝計又克閬綿二州五月至成  
都破賊十萬餘斬首三萬級獲順及鎧甲僭僞服用甚  
衆朝議賞功中書欲除宣徽使太宗曰朕讀前代史書  
不欲令宦官預政事宣徽使執政之漸也止可授以他  
官宰相力言繼恩有大功非此任無足以爲賞典上怒  
深責相臣命學士張洎錢若水議別立宣政使序位昭  
宣使上以授之進領順州路防禦使繼恩握重兵久留  
成都轉餉不給專以宴飲爲務每出入前後奏音樂又  
令騎兵執博局棋枰自隨威振郡縣僕使輩用事恣橫



縱所部剽掠子女金帛軍士亦無鬪志餘賊逆伏山谷  
間州縣有復陷者太宗知之乃命入內押班衛紹欽同  
領其事又遣樞密直學士張鑑西京作坊使馮守規乘  
傳督其捕賊議分減師徒出蜀境以便糧運高品王文  
壽者隸繼恩麾下繼恩遣領虎翼卒二千分遂州路追  
討文壽御下嚴急士卒皆怨一夕臥帳中指揮使張麟  
遣卒排闥入斬文壽首以出會夜昏黑麟猶疑其非然  
炬照之曰是也時嘉州賊帥張餘有衆萬餘麟卽以所  
部與之合賊勢甚盛初奏至太宗欲盡誅軍人妻子近  
臣或請勿殺悉索營中書遣帥招撫諭以釋罪親屬皆  
全必自引來歸因可破賊上然之令巡檢程道符諭旨  
亡卒斬麟春首送繼恩皆自拔來歸因使爲鄉導擊賊  
悉平之至道二年春布衣韓拱辰詣闕上言繼恩有平  
賊大功當秉機務今止得防禦使賞甚薄無以慰中外  
之望上大怒以拱辰惑衆杖函黥面配崖州俄召繼恩  
太宗崩命與李神福按行山陵加領桂州觀察使繼恩  
初事太祖特承恩顧及崩夕太宗在南府繼恩中夜馳  
詣府邸請太宗入太宗忠之自是寵遇莫比喜結黨邀  
名譽乘間或敢言薦外朝臣由是士大夫之輕薄好進  
者從之交往每以多寶院僧舍爲期有潘閬者能詩詠



賈藥京師繼恩薦之召見賜進士第尋察其狂妄追還詔書及真宗初繼恩益豪橫頗欺罔漏泄機事與參知政事李昌齡緘題往來多請託至有連宮禁者素與胡旦善時將加恩密諉其為褒辭又士人詩頌盈門上惡其朋結黜為右監門衛將軍均州安置籍沒貲產多得蜀土僭擬之物昌齡責忠武軍節度行軍司馬旦削籍長流尋州詔中外臣僚曾與繼恩交識及通書尺者一切不問咸平二年卒於貶所遣使將其家屬還京師假官舍處之四年聽歸葬大中祥符三年特詔追復官爵以白金千兩賜其家子懷珪轉入內高班

李神福開封人父繼美仕後唐為內侍顯德初為御廚都監時內臣止以服色為貴太祖特賜紫後至右領軍衛將軍神福少給事晉王府謹恪解上意未嘗少怠太宗卽位授入內高品從征太原攻城之際往來梯衝間宣傳詔命卽行在所遷殿頭太平興國六年擢入內高品押班遷副都知勾當翰林司轉入內內班都知兼勾當祗候內品班淳化四年遷崇儀副使勾當皇城司屬初易黃門之號轉入內黃門都知俄加宮苑使太宗好筆札神福每侍側多獲別本之賜及不豫神福朝夕左右躬侍藥膳真宗卽位遷皇城使內侍省入內內侍都



知領恩州團練使勾當永熙陵行宮事時模寫太宗聖容以神福立侍未幾求罷都知加昭宣使勾當皇城司賜第宮城側遣脩內工爲葺之咸平二年秋閱兵東郊以神福爲太內都部署是冬幸大名與王繼英並爲行宮使四年勾當三班部脩含光殿賜賚甚優景德初兼領親王諸宮使二年改宣政使從謁諸陵復爲行宮使進幸西京賜酺命神福主其事大中祥符初天書降夕神福與劉承珪鄧永遷李神祐石知顥張景宗藍繼宗同直禁中賜以器幣緡錢京師酺會又令神福與白文舉閻承翰同典之是歲封泰山與曹利用同經度行宮

道路及車駕進發又爲行宮使禮畢授宣慶使領昭州防禦使整肅禁衛先是諸司使止于宣政故特置使額以寵之二三年卒年六十四贈潤州觀察使神福性恭愿和易每爲衛紹欽所詬罵皆引避不校在禁闈五十年稱爲長者然久掌三班無規制遠近失叙有請託者不能拒之人譏其所守子懷斌懷贊弟神祐

神祐初以父任授殿頭高品太祖將納孝章皇后命神祐奉聘禮于華州乾德五年征太原負御寶從行開寶二年又從征太原時有詔緣邊和市軍儲車駕在潞州聞之且慮擾民令神祐馳驛止之時詔下已五日神祐



一夕而及晉陽一日甲士旣陣賊潛縱火焚梯衝亟命神祐部衛兵爲援斬賊甚衆餘悉潰去王師伐廣州隨軍賞給劉鋹平先部帑藏之物赴京師及土寇周瓊等叛又副尹崇珂討平之六年隨曹彬南征克關城擒僞將朱令贇命神祐馳入獻捷書賜錦袍金帶太宗卽位遷南作坊副使錢俶歸朝命神祐往按府藏之積再征太原領工徒千人隨駕以備繕完甲兵劉繼元表納降欵太宗陳儀衛城北臺以受之繼元移時未至神祐馳單騎入城俄頃引繼元至及北伐燕薊命與劉延翰統精騎爲大陣之援車駕爲還又令率兵屯定州以備契丹太平興國六年滑州治河防材葦未具命神祐馳往垣曲伐薪蒸四百萬以濟其用七年契丹寇邊命領兵屯瀛州俄改崇儀使提點左右藏庫遷洛苑使至道初西鄙不寧命爲靈環排陣都監率衆至烏白池而還俄駐永興復護糧運抵朔方真宗嗣位轉內園使邠州都監車駕北巡改天雄軍都監子城內巡檢時北兵充斥道途阻塞命神祐單騎諭密旨於諸將敵騎數百忽至神祐乃周麾而呼若召伏兵敵懼而逃遂達其命俄充邢州排陣都監勾當西八作司景德初上幸澶州領隨駕壕砦三年遷入內都知從東封還遷南作坊使時內侍



將遷秩有扈從升山不升山或不預從祀者令神祐第其勤狀上親閱而叙遷之有范守遜皇甫文史崇貴張延訓等皆嘗有譴累而互陳勞効且言神祐等品第非當泣訴于上止而復來者數四守遜等先改內常侍上怒悉停其官神祐洎石知顛副都知張景宗藍繼宗並坐削職尋掌御厨七年卒年六十六大中祥符六年錄其孫永和爲三班奉職神祐性謹愿曉音律頗好篇詠子懷岳太宗時嘗請爲道士後復內侍多屯邊郡常持大鐵鞭以鬪賊屢中流矢至供奉官懷儼爲內殿崇班劉承規字大方楚州山陽人父延翰內班都知承規建隆中補高班太宗卽位超拜北作坊副使時泉帥陳洪進歸朝遣承規疾置封具府庫會土民嘯聚爲寇承規與知州喬維岳率兵討定之太平興國四年命與內衣庫使張紹勅等六人率師屯定州以備契丹又護滑州決河雍熙中勾當內藏庫兼皇城司出爲鄜延路排陣都監改崇儀使遷洛苑使至道中與周瑩同簽書提點樞密宣徽諸房公事仍加六宅使承規懇辭帝雖不許而嘉其退讓真宗立瑩爲宣徽使以承規領勝州刺史簽書宣徽院公事尋讓宣徽之務加莊宅使咸平三年遷北作坊使時邊境未寧議脩天雄軍城壘命承規乘



傳經畫又命提舉內東崇政殿等諸門遷宮苑使上詢承規西事請益環州本波鎮戍兵以爲諸路之援從之俄兼勾當羣牧司景德二年與李允則使河間按視嘗經戰陣等處將卒之勞是歲置官提舉京師諸司庫務以承規領之所創局署多所規制改皇城使與林特李溥議更茶法四年三司上言新課增羨承規以勞加領昭州團練使大中祥符初議封泰山以掌發運使遷昭宣使長州防禦使會脩王清昭應宮以承規爲副使祀汾陰復命督運議者以自京至河中由陸則山險具舟則湍悍承規決議水運凡百供應悉安流而達自朝陵

東封及是皆留掌大內禮成當進秩表求休致手詔敦勉仍作七言詩賜之拜宣政使應州觀察使五年以疾求致仕脩宮使丁謂言承規領宮職藉其督轄望勿許所請第優賜告詔特置景福殿使名以寵之班在客省使上仍改新州觀察使上作歌以賜承規以廉使月稟歸於有司手詔褒美復定殿使奉以給之本名承珪以父疾羸瘵上爲取道家易名度厄之義改珪爲規疾甚請解務還私第聽之仍許皇城常務上印日內藏庫有制就取商度又再表求罷官檢校太傅左驍衛上將軍安遠軍節度觀察留後致仕七月卒年六十四廢朝



贈左衛上將軍鎮江軍節度諡曰忠肅承規事三朝以  
精力聞樂較簿領孜孜無倦自掌內藏僅三十年檢察  
精密動著條式又制定權衡法語在律曆志性沈毅徇  
公深所倚信尤好伺察人多畏之上崇瑞命脩祠祀飾  
宮觀承規悉預聞作王清昭應官尤爲精麗屋室有少  
不中程雖金碧已具必毀而更造有司不敢計所費二  
聖殿塑配饗功臣特詔塑其像太宗之側承規遇事亦  
或寬恕鑄錢工常訴本監前後盜銅瘞也數千斤承規  
佯爲不納因密遣人發取還官不問其罪咸平中朱昂  
杜鎬編次館閣書籍錢若水脩祖宗實錄其後脩冊府  
元龜國史及編著讐校之事承規悉典領之頗好儒學  
喜聚書間接文士質訪故實其有名於朝者多見禮待  
或密爲延薦自寢疾惟以公家之務爲念遺奏求免贈  
賻詔葬上甚嗟惜之遣內臣與鴻臚典喪親爲祭文王  
清昭應宮成加贈侍中遣內侍鄧守恩就墓告祭子從  
愿爲西染院使

閻承翰真定人周顯德中爲內侍入宋事太祖以謹愿  
稱太宗時擢爲殿頭高品稍遷內侍供奉官內殿崇班  
先是入作司材木頗有隱弊承翰建議於都城西置事  
材場治材以給之雍熙中知廣州徐休復奏轉運使王



延範不軌狀遣承翰馳往同逮捕下獄就鞠之考掠過苦延範遂坐誅李順亂蜀命爲川峽招安都監賊平授西京作坊副使會增募金吾兵以承翰及劉承蘊分充左右金吾都監兼街仗司事俄罷之真宗卽位改西京作坊使內侍左班副都知咸平三年河決鄆州王陵埽遣承翰護塞時議徙鄆州以避河患又詔承翰與工部郎中陳若拙乘傳規度徙于舊治之東南五年入內都知韓守英爲鎮定高陽關三路排陣都鈐轄上以其素無執守議別擇人因謂宰相曰承翰雖無武勇然涖事勤恪乃令代守英時中山屯兵甚衆艱於飛輓承翰請鑿

渠計引唐河水自嘉山至定州三十二里又至蒲陰東六十二里合沙河經邊吳泊入界河以濟饋運亦可旁爲方田上嘉而從之渠成人以爲便優詔褒之景德初契丹謀寇順安軍承翰奉詔發椎霸精兵與荆嗣張延同築壘禦之俄又遣詣德清軍規度重脩城壘車駕北征承翰先在澶州北城奏契丹兵在近請不度河上不聽促駕度浮橋二年加領廉州刺史勾當羣牧司多條上馬政遂兼羣牧副使時契丹結好始置國信司主交聘之事以承翰領之多所規置大中祥符初改西京左藏庫使充夏州趙德明加恩官告使還請於蒲洛河置



館以待夏臺進奉使上以荒負勞役不許四年遷內園使左班都知領獎州團練使有西京左藏庫副使趙守倫久典廐牧至是又掌估馬與承翰聯職任雖素為姻家然不相得遂各訟訴並付御史臺承翰坐擅用羣牧司錢當贖金三十斤守倫坐違制移估馬司當免所居官典吏當杖春詔寬其罰承翰贖金十斤守倫贖金二十斤典吏亦降從杖羣牧都監張繼能判官陳越田穀勾當騏驎院楊保用估馬楊繼凝皆釋之制置使陳堯叟特免按問六年上製內侍箴賜之承翰表請刻石省中明年建應天府為南京作鴻慶宮設太祖太宗像遣

承翰自京奉往授南作坊使入內都知未幾卒年六十八贈懷州防禦使承翰性剛彊所至過於檢察之和懿之譽子文應西京左藏庫使

秦翰字仲文真定獲鹿人十三為黃門開寶中遷高品太平興國四年崔彥進領衆數萬擊契丹翰為都監以善戰聞太宗因加賞異謂可屬任雍熙中出為瀛州駐泊仍管先鋒事遷入內殿頭高品鎮定高陽關三路排陣都監淳化四年補入內押班趙保忠叛命李繼隆率師問罪翰監護其軍次延州翰慮保忠遁逸即乘驛先往矯詔安撫以緩其陰計王師至翰又諷保忠以地主



之禮郊迎因並驅而出保忠遂就擒以功加崇儀副使  
至道初爲靈環慶州清遠軍四路都監真宗卽位加洛  
死使入內副都知咸平中河朔用兵以爲鎮定高陽關  
排陣都監敗契丹于莫州東追斬數萬盡奪所掠老幼  
詔褒之徙定州行營鈐轄王均之亂爲川峽招安巡檢  
使時上官正與石普不協翰恐生事爲曉譬和解之親  
督衆擊賊中流矢不却五戰五捷遂克益州上手札勞  
問翼日進至廣都斬首千餘級獲馬數千匹歸朝遷內  
園使領恩州刺史出爲鎮定高陽關前陣鈐轄又徙後  
陣破契丹一萬衆于威虜軍西俘其鐵林大將等十五  
人又爲邠寧涇原路鈐轄兼安撫都監率所部按行山  
外召戎落酋帥諭以恩信凡三千餘帳相率內附未幾  
康奴族拒命翰與陳興許均深入擊之斬級數千焚其  
廬帳獲牛馬甚衆復與陳興曹瑋襲殺童埋軍主于武  
延鹹泊川詔書加獎賜錦袍金帶白金五百兩帛五百  
疋景德初車駕將北巡先遣翰乘傳往澶魏裁制兵要  
許便宜從事俄充邢洛路鈐轄與大軍會德清軍張掎  
角之勢又召爲駕前西面排陣鈐轄管勾大陣翰卽督  
衆環城浚溝洫以拒契丹功畢契丹兵果暴至翰不脫  
甲胄七十餘日契丹乞和凱旋留泊澶州月餘令率所



部兵還京師加宮苑使入內都知出爲涇原儀渭鈐轄先是西鄙無藩籬之蔽翰規度要害鑿巨塹計工三十萬役卒數年而成不煩於民就遷皇城使入內都知以翰在邊久宣力勤盡特置是名以寵異焉翰表讓不聽大中祥符初求從東封手詔諭以西垂委任之意改昭宣使又爲羣牧副使祀汾陰是歲夏州屬戶有擾境上者卽日遣翰往睢上按視遍巡邊部及翰至事寧復還扈從凡行在諸司細務悉令裁決不須中覆禮畢加領平州團練使奉祀亳州掌如汾陰八年營葺大內詔翰參領其事閏六月暴卒於內庭之廡年六十四上甚悼

惜爲之泣下贈貝州觀察使賻祔加等脩內畢詔遣使以襲衣金帶賜其家翰倜儻有武力以方略自任前後戰鬪身被四十九創李繼遷之未賓也翰因使常出入其帳中無疑間嘗白太宗言臣一內官不足惜願手刺此賊死無所恨太宗深嘉其忠翰性溫良謙謹接人以誠信羣帥有剛狠不和者翰皆得其懽心輕財好施與將士同休戚能得衆心皆樂爲用其歿也禁旅有泣下者九年重贈彰國軍節度詔楊億撰碑文億以其不蓄財表辭所贄物雖朝廷不許而時論美之子懷志內殿崇班



周懷政并州人父紹忠以黃門事太宗從征河東得懷政于亂屍間養爲子給事禁中累至入內高品太中祥符初真宗東封命脩行宮頓逝及奉泰山天書馳驛赴闕轉殿頭天書每出宮與皇甫繼明並爲夾侍東封禮成與內殿崇班康宗元留泰山脩園臺轉入內西頭供奉官祀汾陰轉東頭六年劉承規卒擢內殿崇班入內押班勾當皇城司會朝謁大清真宮與閻承翰等同管勾大內事七年奉天書摹刻于乾元殿爲刻玉都監又爲脩兗州景靈宮太極觀都監俄遷內殿承制是冬命起居舍人知制誥盛度爲會真宮醮告使懷政爲都監遷爲王清昭應宮都監兼掌景靈宮會靈觀使刻玉成遷如京副使九年建資善堂以懷政爲都監壽丘宮觀成優賜襲衣金帶遷崇儀使天禧大禮又爲脩奉寶冊都監加領長州刺史是冬遷洛苑使二年春遷左藏庫使仁宗爲皇太子命爲入內副都知管勾左右春坊轉左騏驎使三年領英州團練使加昭宣使懷政日侍內廷權任尤盛於是附會者頗衆往往言事獲從同列位望居右者必排抑之中外帑庫皆得專取因多入其家性識凡近酷信妖妄有朱能者本單州團練使田敏廝養爲人凶狡遂賂懷政親信得見因與侍卒姚斌妄談神



怪以誅之懷政大惑援能至御藥使領階州刺史俄於終南山脩道觀與劉益輩造符命託神言國家休咎否臧大臣及寇準鎮未興能為巡檢倚準舊望欲實其事準好勝喜其附已多依違之朝臣屢言懷政之妄真宗含忍不斥然漸踈遠之懷政憂懼時使小黃門自禁中出詐稱宣召入內東門坐別室久之而還以欺同類會準為相踰年而罷懷政愈畏獲譴不自安四年七月與弟禮賓副使懷信謀潛召客省使楊崇勳內殿承制楊懷吉閣門祗候楊懷玉會皇城司期以二十五日竊發殺丁謂等復相寇準奉真宗為太上皇傳位太子前夕

崇勳懷吉詣丁謂第密告之謂卽夜偕崇勳懷吉至曹利用第計議翌日利用入奏真宗怒命收懷政令宣徽北院使曹瑋與崇勳於御藥院鞫訊具狀帝坐承明殿臨問懷政但祈哀而已命斬于城西普安寺父內殿承制紹忠及懷信並杖配復岳州子姪勒停貲產沒官朱能父左武衛將軍致仕諤母周氏罰銅百斤子守昱守吉分配邵蔡道州懷政僕使親從並杖配海島遠州部下使臣貶秩有差懷政之未敗也紹忠嘗詬之曰斫頭豎子終累我懷信謂之曰兄前事必敗宜早詣上首實庶獲輕典及其謀亂又泣拜止之不聽故皆得免死右



街僧錄澄遠以預聞妖詐決杖黥配郴州內供奉官譚元吉高品王德信高班胡允則黃門楊允文與懷政協同妖妄皆杖配遠州入內押班鄭志誠與能書閣往還削兩任配房州入內供奉官石承慶嘗爲懷政所召夜二鼓不下皇城門鑰以待黃門黃守忠見之戒門卒勿納至是言其事承慶坐削兩任配宿州楊懷玉次日始詣樞密院自陳責授侍禁杭州都監擢崇勳內客省使桂州觀察使懷吉如京使賜以金帶金銀懷政旣誅亟遣入內供奉官盧守明鄧文慶馳驛求興捕朱能劉益李貴康玉唐信道士王先張用和悉免死配遠州能偵

知使者至衷甲出殺守明以叛詔遣內殿承制江德明入內供奉官于德潤發兵捕之能入桑林自縊死朱興乾耀都巡檢供奉官李興本軍十將張順斷能及其子首以獻補興閣門祗候順牢城都頭以劉益等十一人黨能害中使礫于市王先李貴唐信張用和八人皆處斬能母妻子弟皆決杖配隸閣門祗候穆介知朱興軍府朱巽轉運使梅詢劉楚知鳳翔府臧奎等坐與懷政能交結相稱薦皆論罪降寇準太常卿再貶道州凡朝士及朱興鳳翔官吏與準厚善者悉降黜焉

張崇貴真定人太祖時爲內中高品稍遷殿頭太平興



國中以善射選爲御帶錢俶納土命馳往閩城防儲侍  
之數親征太原從崔彥進李漢瓊先路視水草端拱初  
補內供奉官淳化四年命乘傳之延州招羗戎之內附  
者發庫錢犒給以金幣賜酋領將行轉內班右班押班  
就命管勾鄜延屯兵李繼隆討李繼遷詔崇貴以延安  
兵犄角進討及擒趙保忠留崇貴與石霸守綏州徙平  
夏民以實之繼遷扼橐駝路驅脅內屬戎人崇貴與田  
敏率熟倉族凡遇戰於雙堽殺二千餘級掠牛羊橐駝  
鎧甲甚衆連詔褒諭繼遷走漠中遣其將佐趙光祚張  
浦求納款會于石堡崇貴推牛羶酒犒諭之給以錦  
袍帶會改內班爲黃門命爲黃門右班押班仍加內殿  
崇班又改黃門爲內侍職隨易焉旣而繼遷貢橐駝名  
馬待罪遣崇貴往賜器幣茶藥衣物至道元年進崇儀  
副使內侍右班副都知時繼遷復叛劫芻餽于浦洛河  
二年詔李繼隆大發師進討賊圍靈州急太宗將棄之  
廷議未決命崇貴與馮訥乘傳往議其事乃益兵固守  
就命爲靈環慶州清遠軍路監軍又爲排陣都監眞宗  
立拜洛苑使右班都知管勾并州軍馬自至道後五路  
討賊兵戰相繼卒無成功及是保吉復脩貢詔以定難  
節度授之命崇貴持詔命衣帶器幣以賜使還加六宅



使咸平元年又命管勾鄜延屯兵泊延安改駐泊都監  
又爲鈐轄其後繼遷復與熟戶李繼福爲隙因緣內擾  
崇貴與張守恩擊之焚廬舍獲貨畜器甲生口甚衆又  
與王榮禦賊獲具裝馬數十四再詔褒飭四年詔歸俄  
領獎州刺史復涖鄜延仍制置沿邊青白鹽事與衛超  
領軍入敵境焚廬舍帳幕獲廩糗牛羊復被詔獎崇貴  
屢訶契丹事傳近以聞願身當一隊爲前鋒詔不允景  
德元年保吉死其子德明尚幼崇貴移書諭朝廷恩信  
德明請俟釋服稟命詔書慰撫以向敏中爲緣邊安撫  
使自是邊防事宜經制小大皆崇貴專主之築臺保安  
北十里許召戎人會議與之盟約二年春召赴關面授  
方略許德明以定難節度西平王賜金帛緡錢各四萬  
茶二萬斤給內地節度奉聽回圖往來放青鹽禁凡五  
事而令德明納靈州土疆止居平夏遣子弟入宿衛送  
略去官吏盡散蕃漢兵及質口封境之上有侵擾者稟  
朝旨凡七事德明悉如約惟以子弟入質及納靈州爲  
難故亦禁鹽如舊不許回圖三年九月以德明誓表來  
上崇貴因請入朝許之以功拜皇城使內侍左右班都  
知領博州團練使又持旌節誥命授德明太常博士趙  
湘爲之副四年使還會車駕上陵次瓊林苑崇貴對于



苑中卽命爲行宮使是秋復還延安供奉官曹信時監邊軍信善琴崇貴與石普軍中宴集令信奏之信以久廢爲辭崇貴與普因撫其他過以聞真宗知其誣奏不問大中祥符元年加昭宣使崇貴又在邊善識羌戎情爲西人畏服每德明有所論述及境上交侵皆先付裁制夏州趣邊有二路其文移至環慶者皆付延州議焉嘗請置緣邊安撫使如北面之制上曰西鄙別無經營苟德明能守富貴無慮朝廷失恩信也增置署司徒爲張皇不若委卿靜制之二年上言久去鄉里願得告歸葬父母許之錫與甚厚復命爲都鈐轄提舉榷場崇貴乞留京師面諭委屬之意聽歲入奏事四年八月卒年五十七帝悼惜之贈豐州觀察使內侍護喪還京師子承素東染院副使

張繼能字守拙并州太原人父贊晉末爲內班繼能建隆初以黃門事禁中太平興國初爲內品從征河東命主城南洞屋以勞遷高品契丹入寇命爲高陽鎮定路先鋒都監從崔彥進戰長城口多所俘馘明年又與彥進敗契丹于唐興口轉殿頭高品雍熙中夏州叛命李繼隆爲銀夏都部署以繼能監軍俄徙護定州屯兵領驍捷卒三千屯五回嶺端拱初遷入內殿頭從趙保忠



討李繼遷保忠薦其有材命與保忠同經略其事代還  
掌內弓箭庫淳化三年與白承睿護芻粟入靈武會繼  
遷復寇邊命繼能承睿與知靈州侯延廣領驍卒五千  
同主軍務俄留爲本州都監及鄭文寶議城威州清遠  
軍繼能護其役工畢命與西京作坊副使張延洲同知  
軍事又與田紹斌同掌積石砦就遷內供奉官靈環慶  
清遠軍後陣都監與西人轉鬪敗走之復還清遠詣闕  
奏事遷內殿崇班未幾拜供備庫副使復遣護環州屯  
兵徙涇原儀渭都巡檢使真宗卽位遷崇儀使靈環十  
州軍兵馬都監兼巡檢安撫使咸平二年王均之亂命  
爲川峽兩路招安巡檢使成都平留爲利州招安巡檢  
尋召歸會銀夏寇警復爲邠寧駐泊都監夏人寇清遠  
軍營于積石河繼能與楊瓊馮守規在慶州逗遛不時  
赴援致陷城堡又焚棄青岡砦特詔下御史府免死長  
流儋州景德二年會赦還爲內侍省內常侍又爲陝西  
捕賊巡檢獲千餘人改內殿崇班從朝陵爲行宮四面  
巡檢四年宜州卒陳進爲亂初知州劉永規馭下嚴酷  
課澄海卒伐木葺州廨數不中程卽杖之至有率妻孥  
趣山林以采者雖甚風雨不停其役故進因衆怨殺永  
規及監軍國鈞擁判官盧成均爲帥據其城七月奏至



詔東上閤門使忠州刺史曹利用供備庫使賀州刺史張煦爲廣南東西路安撫使如京副使張從古及繼能副之虞部員外郎薛顏同勾當轉運事發荆湖蘄黃州兵討之上語近臣曰番禺寶貨雄富賊若募驍果立謀主沿流東下邇廣州則爲患深矣遣內侍高品周文質使廣州監屯兵會隣路巡檢使控要路集東西海戰權扼端州峽口賊悉衆來攻柳城縣殿直韓明許貴郝惟和以所部兵千餘禦敵明貴死之惟和僅以身免成均奉宜州印遣使詣舒賁求赦罪是夕進復陷柳城官軍退保象州賊又寇懷遠軍知軍殿直任吉與龜桂巡檢

殿直張崇寶侍禁張守榮擊走之賊退而復集者累日吉輩固守屢與鬪大獲其器甲又攻天河砦砦兵甚少監軍奉職錢吉部分嚴整一戰敗之賊衆屢斃頗潰去衆心攜貳將棄宜州以家屬之悼耄者五百人隕江中率其衆裁三千趣柳象將入容管初至柳州限江不能度知州王昱望賊遁走城遂陷朝廷以詔書四十分揭要路諭賊歸順者悉釋其罪賊挈族居思順州分兵攻象州利用命入內高班于德潤以千兵倍道襲逐利用等繼至遇賊武僊縣之李練鋪賊初不知覺惟進率衆來拒直犯前軍前軍寄班侍班郭志言麾騎士左右縱



擊賊衣順水甲執標牌以進飛矢攢鋒不能卻前軍卽持棹刀巨斧破其牌史崇貴登山大呼曰賊走矣急殺之賊心動衆遂潰逐北至象州城下賊若猶有據長竿瞰城中者成均始挈其族以詔書來降乃斬進并其黨生擒賊帥六十餘人斬首級獲器甲戰馬甚衆利用分兵捕餘寇遣于德潤馳奏其事授利用引進使煦如京使從古莊宅副使繼能供備庫使志言供備庫使又以御前忠佐馬步軍副都軍頭郭全豐爲都軍頭領勤州刺史歸遠軍士手殺進者李昊劉宗趙敏並補本軍頭張守榮爲供奉官閣門祇候張崇實任吉並爲供奉官

錢吉爲右侍禁又以知象州大理寺丞何邴最有勞優拜祠部員外郎賜緋又賜邴三子知道知古知常出身邴之親屬同扞寇者悉甄叙之升象州爲防禦使初賊攻象州城在高丘上素無井閉壘之日皆以乏水爲慮賴天雨停水將竭而雨復下如是者兩月汲之以濟山中無烽候每欲破賊卽禱於城西神祠或見巨蟒吞龜是日果有克獲衆以爲神靈助順之應張守榮俄病瘴遣尚醫馳往視之未至而卒贈如京使錄其子宮十二月餘寇悉平東封留繼能爲京舊城內巡檢鈐轄俄加東染院使大中祥符二年入內都知李神福等坐事悉



罷擢繼能入內侍省副都知時宗室多召侍講說書  
上嘉其勤學令講誦日別給公膳專遣繼能主之俄又  
與內殿承制岑保正提點郡縣主諸院事三年兼羣牧  
都監祀汾陰留掌大內兼舊城內巡檢鈐轄俄領會州  
刺史謁太清宮爲天書扶持都監七年以疾求解職不  
許命爲涇原儀渭鎮戎軍兩路鈐轄未幾徙廊延都鈐  
轄先是內屬戶殺漢口者止罰孳畜繼能則麗於常法  
繇是西人畏而不敢犯德明雖受朝命而羌部不絕寇  
境繼能日課卒截竹爲簽署字其上且言以備將士記  
殺獲功狀賊聞之甚懼歸朝復涖羣牧仁宗在儲宮嘗  
親書一幅賜之繼能以聞真宗亦爲標題其末人以爲  
榮九年坐前護脩莊穆皇后陵摧陷左授西染院使掌  
往來國信天禧初復西京左藏庫使國信司吏陳誠者  
頗巧黠繼能欲援置羣牧司而誠先隸羣牧坐事停職  
至是羣牧吏左宗挾其宿負白制置使曹利用故誠不  
遂所求繼能怒宗之沮已密遣親事卒偵宗會宗弟元  
喪妻宗嘗爲假敦駿軍校馬送葬及還元抵飲肆與酒  
保相毆繫府中而假馬之事未發誠卽白繼能請屬府  
中并劾其事知府樂黃目受屬獄未就爲羣牧副使楊  
崇勳所發繼能坐罷內職降授西京作坊使出爲邠寧



鈐轄繼能自陳不願外任得掌瑞聖園尋領往來國信  
所三年復爲西京左藏庫使內侍右班副都知未幾遷  
崇儀使以衰老求解職轉內園使掌瓊林苑五年卒年  
六十五特贈汀州團練使錄其子懷忠爲大理寺丞孫  
逖爲三班奉職遜爲借職春坊祇候繼能性沉密知兵  
頗勇敢喜讀書然好治生晚年急於聚蓄衆以此少之  
何邴後歸朝知磁州而卒一子知崇裁十餘歲特補大  
廟齋郎又徙其姪平夷尉知古爲滄陽尉省郎無賞延  
之例猶以城守勞故錄焉

衛紹欽開封人父漢超內侍高品紹欽始以中黃門給

事晉邸太宗卽位補入內高品甚被親倚從征太原命  
督諸將攻城劉繼元降命領驍卒先入城燒其營柵遷  
殿頭高品雍熙二年擢入內西頭供奉官淳化中部脩  
皇城功畢授內侍押班五年加崇儀副使李順之亂王  
師致討與王繼恩同領招安捉賊事遇賊鬪學射山南  
又攻清水壩破雙流砦招降數萬衆斬千餘級順死餘  
黨保險爲寇又與楊瓊先扼要路以邀之擒斬萬餘人  
獲器甲槍槊千餘遣別將曹習領兵捕餘賊于安國鎮  
斬三百級時嘉眉二州賊尙擾城郭又遣內殿崇班宿  
翰討之兩川平召還深被褒勞真宗副位拜宮苑使領



愛州刺史充入內副都知脩奉永熙都監既復土遂爲  
陵使景德二年改皇城使從幸河朔命爲車駕前後行  
宮四面都巡檢次澶淵命領扈駕兵守河橋三年加昭  
宣使朝諸陵復爲行宮巡檢駐洛陽命爲皇城內外都  
巡檢歷掌三班院皇城儀鸞翰林司卒年五十六紹欽  
苛復少恩不爲衆所附太平興國中江東有僧詣闕請  
脩天台壽昌寺且言寺成願焚身以報太宗允其請命  
紹欽往督營膳既訖役遽積薪於廷請僧如願僧言欲  
見至尊面謝紹欽曰昨朝辭日親奉德音不煩致謝僧  
惴惴偃蹇顧道俗望有救之者紹欽卽促令躋薪上火  
既盛僧欲投下紹欽遣左右以叉抑按而焚之子承慶  
至內殿承制

石知顥真定人曾祖承渥梁尚食使祖守忠晉內供奉  
官父希鐸高品知顥形貌甚偉建隆中授內中高品太  
宗卽位改供奉官雍熙中諸將征幽薊以知顥隨軍歸  
掌儀鸞司淳化中明州初置市舶司與蕃商貿易命知  
顥往經制之轉內殿崇班親王諸宮都監從王繼恩平  
蜀寇就遷西京作坊副使咸平初遷正使帶御器械契  
丹犯邊上北巡命爲天雄軍澶州巡檢使俄改德博等  
州緣河巡檢使兼安撫加領長州刺史三年戊鎮定高



陽關三路押大陣是冬改高陽關駐泊行營鈐轄歸朝復掌親王諸宮事景德中自京抵泗遣徒治河堤命總其役初計工累月及是浹日而畢上面加褒諭賜白金千兩授入內都知大中祥符初遷內園使俄以定內侍遷秩品第不當爲其列所誣坐罷都知三年爲并代州鈐轄遷莊宅使徙鎮定高陽關鈐轄四年命與內殿崇班張繼能供奉官侍其旭同脩太祖神御殿上封求覲闕下復掌羣牧司三班院親王諸宮事天禧二年爲并代州鈐轄兼管勾麟府路軍馬事三年卒年六十九孫

全彬

全彬字長卿以知顯奏補入內小黃門累遷西頭供奉官仁宗使致香幣于南海密詔察所過州縣吏治民俗還具以對帝以爲忠謹峽右羣盜殺鳳州巡檢遣往擒滅之元昊叛全彬監鄜州兵救延州解圍去經略使明鎬言其勇略善將得邊人情除并代州都監加內侍押班進鈐轄徙鄜延還爲押班儂智高寇廣南以爲湖南江西路安撫副使出桂林請于宣撫使狄青願獨當一隊以自效於是使將佐方兵力戰于邕州南方平領綿州防禦使張貴妃居寧華殿閣命全彬提舉妃薨治喪過制皆劉沆王洙與全彬共爲之數月進宮苑使利州



觀察使給兩使留後奉俄爲入內副都知制誥劉敞封還詞命居三月復授之轉領信武軍留後爲永昭陵鈐轄時去永定復土四十二年有司多亡其籍全彬以心計辦治遷福延宮使提點奉先院熙寧中卒年七十六贈太尉定武軍節度使諡曰恭僖

鄧守恩并州人十歲以黃門事太宗淳化中盜起成都從王繼恩往討之至道初就護西蜀屯兵咸平初爲入內高班契丹入寇命石保吉爲鎮定都部署以守恩爲都監踰年入掌騏驎院會龍騎叛卒剽劫環慶遣守恩擒翦之景德初爲澶濮都巡檢又使還慶及茂瀘等州

巡察邊事大中祥符初按獄于濮州雪寃人十餘預監脩王清昭應宮會靈觀七年又兼脩真遊殿景靈宮累遷入內高品供奉官宮成遷內殿承制八年預脩大內改西京作坊副使九年營造皆畢授東染院使充會靈觀都監天禧二年掌軍頭引見司又脩祥源觀成遷崇儀使三年授入內押班河決滑州命爲脩河鈐轄郊祀召爲行宮使收如京使復還本任四年春河復故道遷文思院使歸朝加領昭州刺史是秋掌皇城國信二司整肅禁衛遷入內副都知會建天章閣命領其事又勾當資善堂兼太子左右春坊司守恩長七尺餘狀貌甚



偉泣事幹敏以彊果稱于時五年卒年四十八贈淄州防禦使錄其子官

宋史卷四百六十六終

宋史卷四百六十七

列傳第二百二十六

開府儀同三司上柱國錄軍國重事尚書右丞相監脩國史預經筵事都總裁脫脫等脩

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

宦者二

楊守珍 韓守英 藍繼宗 張惟吉

甘昭吉 盧守懃 王守規 李憲

張茂則 宋用臣 王中正 李舜舉

石得一 梁從吉 劉惟簡

嘉曆二十七年刊

宋史卷四百六十七

列傳



楊守珍字仲寶開封祥符人爲入內黃門習書史學兵家方略善射家僮過堂下一發貫髻人服其精選爲環慶路走馬承受公事契丹謀入塞爲鎮定高陽關行營同押先鋒事會許民周繼宗爲人誣告與外夷交通干證者六十人辭服遣守珍覆問悉辨理出之徒真定保趙等州駐泊都監邕桂等十州安撫都監從曹克明降撫水州蠻築二柵以扼其要天禧初擒盜於青灰山累遷西京作坊使帶御器械永興軍兵馬鈐轄徙真定邠寧路爲內侍省內侍押班提點內弓箭軍器庫進內園使右班都知領端州刺史嘗侍仁宗苑中命乘馬馳射賞其便習賜錦袍卮酒卒贈原州防禦使

韓守英字德華開封祥符人初爲入內高品從征河東數奉詔至石嶺關督戰取隆州遷殿頭久之以西頭供奉官擢入內內侍押班遷副都知隨王繼恩招安西川爲先鋒戰于劔門有功遷西京作坊使劔門都監還勾當三班院進入內內侍都知歷定州鎮定高陽關并代路兵馬鈐轄契丹圍岢嵐軍守英與鈐轄張志言知府州折惟昌帥所部渡河抵朔州以牽賊勢遂破狼水砦俘數百人獲馬牛羊鎧甲以數萬計賊爲解去賜錦袍金帶俄領會州刺史解都知再遷昭宣使復領三班出



爲鄜延路都鈐轄徙并代路建言本路宿兵多百姓困於飛輓今幸邊鄙無事請留騎軍千餘人悉徙內地真宗曰邊臣能體朝廷恤民之意宜詔諸路視此行之提舉在京諸司庫務勾當皇城司爲趙德明官告使歷宣政宣慶二使內侍左班都知領獎州團練使雅州防禦使入內都知管勾脩國史書成進景福殿使又爲延福宮使入內都知復提舉諸司庫務卒贈定國軍節度觀察留後

監繼宗字承祖廣州南海人事劉鋹爲宦者歸朝年十

二遷爲中黃門從征太原傳詔營陳間多稱旨秦州並

邊有大小洛門砦自唐末陷西羌雍熙中溫仲舒諭酋

豪漢獻其地徙衆渭北言者以爲生事請罷仲舒太宗

遣繼宗往按視還奏二砦據要害產良木不可棄帝悅

復使繼宗勞賜仲舒累遷西京作坊副使勾當內東門

元德太后章穆皇后葬爲按行園陵使車駕北征勾當

留司皇城司車駕謁諸陵近陵舊乏水繼宗疏泉陵下

百司從官皆取以濟擢入內副都知爲天書扶持都監

詔與李神祐第東封扈從內臣之勞而入內供奉官范

守遜等訴其不公罷都知祀汾睢復爲天書扶持都監

再遷東染院使明年領會州刺史進崇儀使勾當皇城



司脩王清昭應宮與劉承珪典工作宮成遷洛苑使高州團練使充都監坐章穆皇后陵隧墊貶如京使典脩景靈宮道南作坊使復脩會靈祥源觀車駕幸亳州管勾留司大內公事提舉在京諸司庫務勾當三班院脩國史院爲趙德明加恩使德明與繼宗射繼宗每發必中德明遺以所乘名馬爲內侍省右班都知遷入內都知仁宗卽位遷左騏驎使忠州防禦使未定陵脩奉鈴轄歷昭宣宣政宣慶使累上章求致仕特免入朝拜舞及從行幸頃之復固請罷都知以景福殿使邕州觀察使家居養疾卒贈安德軍節度使諡僖靖繼宗事四朝謙謹自持每領職未久輒請罷家有園池退朝卽亟歸同列或留之繼宗曰我欲歸種花卉弄游魚爲樂爾景福殿置使自大中祥符間至繼宗授者纔三人養子元用元震元用終左藏庫使梓州觀察使元震以兄蔭補入內黃門轉高班給事明肅太后禁中夜火后擁仁宗登西華門左右未集元震獨傳呼宿衛以功遷高品爲三陵都監條列防守法其後諸陵以爲式歷羣牧都監監三館祕閣積官皇城使累遷入內副都知忠州防禦使仙韶院火元震救護火以時息詔褒之賜襲衣金帶卒贈鎮海軍留後元震養子五人畜闖子



張惟吉字祐之開封人初補入內黃門遷殿頭高陽關路走馬承授公事護塞滑州天臺埽役遷西頭供奉官監在京權貨務知嘉州張約以贓敗詔與御史王軫往劾其獄還領內東門司爲脩奉章獻章懿太后二陵承受時議復用李諮權茶筭緡法乃以惟吉爲內殿崇班復監權貨務凡內侍領內東門次遷勾當御藥院而惟吉纔進官衆以爲薄惟吉欣然就職再替以羨餘遷承制爲趙元昊官告使還言元昊驕僭勢必叛請預飭邊備及元昊寇延州遣按視延鄜環慶兩路器甲并訪攻守利害敵旣退夏竦韓琦謀自鄜延深入乘虛擊之命

惟吉募兵汾驍勇副以土兵輕齎赴河外惟吉以爲我師當持重伺變不宜馳赴不測以自困已而元昊果引去還奏稱旨領皇城司遷內侍省押班羣牧都監簡陝西冗兵領軍頭引見司遷供備庫使盡汰軍頭司軍校之罷癯者同提舉在京諸司庫務領恩州刺史爲入內都知商湖決爲澶州脩河都鈐轄轉運使施昌言請亟塞崔嶧以爲歲災民困役宜緩命惟吉按視言河可塞而民誠困財用不足宜少待之從其議遷如京使果州團練使復領皇城司卒惟吉任事久頗見親信而言弗阿徇張貴妃薨將治喪皇儀殿諸宦官皆以爲可獨惟



吉曰此事于典禮須翌日問宰相既而宰相不能執議  
惟吉深以爲非贈昭信軍節度觀察留後逾月又贈保  
順軍節度使諡忠安養子若水字益之以惟吉奏補小  
黃門給事章惠太后殿轉入內高品王師平貝州征儂  
賊皆以幹敏選爲走馬承受賊平以勞進官三遷環慶  
路鈐轄討環州解也曰族復有功歷帶御器械內侍押  
班副都知熙寧初造神臂弓成神宗御延和殿臨閱置  
鐵甲七十步捍衛士射未有中者若水自請射連中徹  
札建慶壽寶慈兩宮典領工作再遷嘉州防禦使以病  
漸解職領輝州觀察使提舉四園苑諸司庫務卒贈天  
平軍留後

甘昭吉字祐之開封人初以內侍殿頭爲英韶州巡檢  
捕盜有功再遷內殿崇班京東路都巡檢齊州武衛小  
校馮坦率管卒二百突入州廳事欲爲變昭吉單騎馳  
往戒所從將士操兵在外先獨見亂卒諭以禍禍令推  
首惡自贖衆疑沮不敢動已而操兵者皆入卽共執十  
餘人告曰此誘我者也昭吉立殺之縱其餘去州以無  
事特遷供備庫副使帶御器械後內侍省押班闕仁宗  
記前功特以授之遷入內副都知英宗卽位之夕昭吉  
直禁中翊衛有勞自文思副使超遷供備庫使康州刺



史昭吉奏曰臣本孤微無左右之舉而先帝知臣朴直  
自小官拔用至此分當從葬今願得洒掃陵寢足矣帝  
愛其忠特授未昭陵使加如京使還朝表辭職以左龍  
武軍大將軍致仕卒昭吉敦實慎密人士稱之

盧守勲字君錫開封祥符人自入內內品累遷禮賓使  
邠寧環慶路鈐轄還爲入內內侍省押班領昌州刺史  
明道中改葬章懿太后而舊藏有水以守勲嘗典葬事  
罷爲永興軍兵馬鈐轄徙鄜延路再遷六宅使加貴州  
團練使進榮州防禦使兼邠寧環慶路安撫都監元昊  
寇保安軍守勲率兵擊走之特遷左驎驥使移陝西鈐

轄初劉平石元孫被執守勲撫膺涕泣不敢出又嘗易  
蕃官馬延州通判計用章勸范雍棄城將保鄜州雍欲  
遣安撫都監李康伯往說賊不肯行賊去而守勲用章  
更相論奏知制誥葉清臣以守勲擁兵觀望請正其罪  
并按二人守勲奪防禦使爲湖北都監用章除籍配雷  
州本城康伯均州都監久之復恩州防禦使遷利州觀  
察使歷真定府定州北京路鈐轄以左衛大將軍致仕  
卒贈保順軍節度使諡安恪養子昭序

王守規真定欒城人入內都都知守忠之弟守忠事真  
宗謹愿慎密眷遇最厚明道時守規爲小黃門禁中夜



半火守規先覺自寢殿至後苑皆擊去其鎖乃奉仁宗及皇太后至延福宮回視所經處已成煨燼翌日執政候起居帝曰非王守規導朕至此幾不與卿等相見以功遷入內殿頭選治京城水決汴河于公賈村決蔡河于四里橋水患以息加帶御器械積官至宣慶使康州防禦使內侍右班副都知卒年六十七贈昭武將軍留後

李憲字子範開封祥符人皇祐中補入內黃門稍遷供奉官神宗卽位歷未興太原府路走馬承受數論邊事

合旨幹當後苑王韶上書請復河湟命憲往視師與韶

進收河州加東染院使幹當御藥院復戰牛精谷拔珂諾城爲熙河經略安撫司幹當公事按視鄜延軍制行至蒲中會木征合董氈鬼章之兵攻破踏白城殺景思立圍河州詔趣赴之憲馳至軍先是朝廷出黃旗書敕諭將士如用命破賊者倍賞於是憲晨起帳中張以示衆曰此旗天子所賜也視此以戰帝實臨之士爭呼用命以進督諸將傍山焚族帳卽日通路至河州賊餘衆保踏白官軍出與戰大破之進至餘川又破賊堡十餘木征率酋長八十餘人詣軍門降捷聞以功加昭宣使嘉州防禦使還爲入內內侍省押班幹當皇城司安南



叛副趙高招討未行高建言朝廷置招討副使軍士須  
共議至節制號令卽宜歸一憲銜之由是屢紛辨遂罷  
憲而令乘驛計議秦鳳熙河邊事諸將皆聽節度於是  
御史中丞鄧潤甫御史周尹蔡承禧彭汝礪極論其不  
可又言鬼章之患小用憲之患大憲功不成其禍小有  
成功其禍大章再上弗聽冷雞朴誘山後生羌擾邊木  
征請自効衆以爲不可憲曰何傷乎羌人天性畏服貴  
種聽之往木征盛裝以出衆聳視皆無鬪志師乘之殺  
獲萬計斬冷雞朴董氊懼卽遣使奉贄効順加宣州觀  
察使宣政使人內副都知又遷宣慶使時用兵連年度  
支調度不繼詔憲兼經制財用裁冗費什六歲運西山  
巨木給京師營繕賜瑞應坊園宅一區元豐中五路出  
師討夏國憲領熙秦軍至西市新城復蘭州城之請建  
爲帥府帝又詔憲領兵直趣興靈董氊亦稱欲往宜乘  
機協力入掃巢穴若興靈道阻卽過河取涼州乃總兵  
東上平夏入于高川石峽進至屈吳山營打囉城趨天  
都燒南牟府庫次葫蘆河而還憲旣不能至靈州董氊  
亦失期師無功憲欲以開蘭會邀功彌責同知樞密院  
孫固曰兵法期而後至者斬况諸路皆至而憲獨不行  
不可赦帝以憲猶有功但令詰擅還之由憲以餽餉不



接爲辭釋弗誅復上再舉之策兼陳進築五利且從之  
會李順舉入奏具陳師老民困狀乃罷兵趣憲赴關道  
賜銀帛四千爲涇原經略安撫制置使給衛三百進景  
福殿使武信軍留後使復還熙河仍兼秦鳳軍馬夏人  
入蘭州破西關降宣慶使憲以蘭州乃西人必爭地衆  
數至河外而相羊不造意必大舉乃增城守塹壁樓櫓  
具備明年冬夏人果大入圍蘭州步騎號八十萬衆十  
日不克糧盡引去又詔憲遣間諭阿里骨結等且選騎  
度河與賊遇破之坐妄奏功狀罷內省職事哲宗立改  
永興軍路副都總管提舉崇福宮御衣中丞劉摯論憲  
貪功生事一出欺罔避興靈會師之期頓兵以城蘭州  
遺患至今永樂之圖逗留不急赴援降宣州觀察使又  
貶右千牛衛將軍分司南京居陳州卒年五十一紹聖  
元年贈武恭軍節度使初諡敏恪改忠敏憲以中人爲  
將雖能拓地降敵而罔上害民終貽患中國云

張茂則字平甫開封人初補小黃門五遷至西頭供奉  
官幹當內東門禁庭夜有盜茂則首登屋以入旣獲賊  
遷領御藥院仁宗不豫中夜促召茂則趨入扶衛左右  
或欲掩宮門茂則曰事無可慮何至使中外生疑耶帝  
疾間欲處以押班懇求補外轉宮苑使果州團練使爲



未興路兵馬鈐轄入爲內侍押班再遷副都知熙寧初同司馬光相視恩冀深瀛四州生隄及六塔二股河利害進入內都知上元夜宮中火督衆卽撲滅詔曰宮禁不驚帑藏如故惟忠與力予固嘉之賜以窄衣金帶累乞退休言受國厚恩廩食過量積而未請者七年乞令三司毀券詔褒之仍進其官哲宗卽位遷寧國軍留後加兩省都都知卒年七十九茂則性儉素食不重味衣裘累十數年不易紹聖論元祐人以茂則嘗預任使追及左監門衛將軍崇寧中入黨籍

宋用臣字正卿開封人爲人有精思彊力以父蔭隸職

內省神宗建東西府築京城建尚書省起太學立原廟導洛通汴凡大工役悉董其事性敏給善傳詔令故多訪以外事同列悉藉以進朝士之乏廉節者往往諂附之權勢震赫一時積勞至登州防禦使加宣政使元祐初言者論其罪降爲皇城使謫監滁州太平州酒稅四任主管靈僊觀紹聖初召爲內侍押班進瀛州刺史徽宗卽位遷蔡州觀察使入內副都知爲永泰陵脩奉鈐轄卒陵下贈安化軍節度使謚僖敏謚議謂用臣爲廣平宋公有天子念公之勞久徙于外之語豐稷論奏以爲凡稱公者皆須者宿大臣與鄉黨有德之士其曰念



公之勞久徙于外斯乃古周公之事於用臣非所宜言也止令賜諡論者是之

王中正字希烈開封人因父任補入內黃門遷赴延福宮學詩書曆筭仁宗嘉其才命置左右慶曆衛士之變中正援弓矢卽殿西督捕射賊悉就擒時年甫十八人頗壯之遷東頭供奉官歷幹當御藥院鄜延環慶路公事分治河東邊事破西人有功帶御器械神宗將復熙河命之規度還言熙河譬乳虎抱王乘爪牙未備可取也遂從王韶入熙河治城壁守具以功遷作坊使嘉州團練使擢內侍押班吐蕃圍茂州詔率陝西兵援之圍解石泉至茂州謂之隴東路王田肥美西羌據有之中正不能討乃因吐蕃入寇言其路經靜州等族榛僻不通邇年商旅稍往來故外蕃因以乘間縣至綿與茂道里均而龍安有都巡檢緩急可倚仗請割石泉隸綿而窒其故道從之隴東遂不可得還使熙河經畫鬼章進昭宣使入內副都知元豐初提舉教畿縣保甲將兵捕賊盜巡檢獻民兵伍保法請於村疇及縣以時閱習悉行其言復往鄜延環慶經制邊事詔凡所須用度令兩路取給無限多寡旣行又稱面受詔所過募禁兵願從者將之主者不敢違問罪西夏以中正簽書涇原路



經略司事詔五路之師皆會靈州中正失期糧道不繼士卒多死命權分屯鄜延並邊城砦以俟後舉自請罷省職遷金州觀察使提舉西太一宮坐前敗貶秩元祐初言者再論其將王師二十萬公違詔書之罪劉摯比中正與李憲宋用臣石得一爲四凶又貶秩兩等久之提舉崇福宮紹聖初復嘉州團練使卒年七十一

李舜舉字公輔開封人世爲內侍曾祖神福事太宗以信謹終始舜舉少補黃門仁宗使督工冶金爲器旣成有美數并上之帝嘉其不欺出爲秦鳳路走馬承受英宗立奏事京師會帝不豫內謁者止之宮門舜舉曰天子新卽位使者從邊方來不得一見而去何以慰遠人

謁者以聞亟召對帝意良悅因言承受公事以察守將不法爲職而終更論最乃使帥臣保任乞免之遂刪舊制熙寧中歷幹當內東門御藥院講筵閣實錄院郭逵討交州以爲廣西幹當公事軍中之政得與講畫或疾置入朝稟受成筭會逵貶亦降左藏庫副使以文思院使領文州刺史帶御器械進內侍押班制置涇原軍馬五路師出無功議再舉李憲督饋糧言受密詔自都轉運使以下乏軍興者皆聽斬民懲前日之役多死於凍餒皆憚行出錢百緡不能雇一夫相聚立柵山澤不受



調吏往逼呼輒毆擊解州至械縣令以督之不能集舜  
舉入奏其事乃罷兵退詣中書王珪迎勞之曰朝廷以  
邊事屬押班及李留後無西顧之憂矣舜舉曰四郊多  
壘此卿大夫之辱相公當國而以邊事屬二內臣可乎  
內臣正宜供禁庭洒掃之職豈可當將帥之任聞者代  
珪慚焉轉嘉州團練使沈括城未樂遣舜舉計議被圍  
急斷衣襟作奏曰臣死無所恨願朝廷勿輕此賊尋以  
死聞贈昭信軍節度使諡曰忠敏舜舉資性安重與人  
言未嘗及宮省事頗覽書傳能文辭筆札在御藥院十  
四年神宗嘗書李舜舉公忠奉上恭勤檢身始終惟一  
以安以榮十九字賜之

石得一開封人爲內侍黃門累官內殿承制神宗時帶  
御器械管幹龍圖天章寶文閣皇城司四遷入內副都  
知元祐初領成州團練使罷內省職御史劉摯言得一  
頃筦皇城恣其殘刻縱遣邏者所在棊布張弮設網以  
無爲有以虛爲實朝廷大吏及富家小人飛語朝上暮  
入狴犴上下惴恐不能自保至相顧以目者殆十年坐  
降左藏庫使卒紹聖中贈隨州觀察使

梁從吉字君祐開封人補入內高班王則反奉命宣慰  
還言小寇無多慮諸將之兵足以翦除若得重臣統其



事不崇朝可平矣於是仁宗以文彥博爲安撫招討使賊平又奏請分河北爲路每路以一帥府統之遂建魏鎮定瀛四帥熙寧初爲邠寧環慶路駐泊兵馬鈐轄夏人寇大順城圍慶州七砦從吉率兵八百餘人與戰獲其酋領又討平寧州叛卒以功升都鈐轄累官皇城使從高遵裕至寧武督士卒攻城身被創甚進入內押班遷永州團練使爲副都知元祐中卒贈成德軍節度使諡曰敏恪

劉惟簡開封人由入內黃門積官至昭宣使康州刺史高陽關路兵馬都監爲入內押班英宗初立惟簡自河

北來朝請對寢門內謁者難之獨引見皇太后惟簡立

福寧殿下雨沾衣不退帝起坐幃中望見呼問曰諸路如汝者幾人何以獨來對曰陛下新卽位臣來自邊塞未瞻天表不敢輒還不知其他帝歎曰小臣知所守如此識其姓名屏間他日神宗覽所題屏擢幹當延福宮自是蒙親信交人叛詔馳驛至桂州審視事勢還言帥臣劉彝貪功生事罪當誅乾德狂童頸不足繫帝信之郭達趙高南征以爲行營承受達高被謫惟簡亦奪一官陝西五路師還受命撫犒士卒以疾先還者不賜惟簡心知其不便至慶州疏言士卒不幸以將臣上違聖



略糧食不繼逃生以歸其情可貸今同立庭中而不預  
賜恐患生倉卒帝用其言均予之又使案閱河北保甲  
振濟京西水災參定諸陵薦獻既而為言者所劾擯不  
用哲宗在藩時惟簡奔奏服勤及親政召至左右以內  
侍押班卒贈昭化軍留後

宋史卷四百六十七終

宋史卷四百六十八

列傳第二百二十七

開府儀同三司柱國錄軍國重事前中書右丞相監脩國史領經筵事都總裁脫等脩

皇明朝列大夫國子監祭酒臣方從哲

承德郎春坊右中允管國子監司業事臣黃汝良等奉

勅重校刊

宦者三

李祥

陳衍

馮世寧

李繼和

高居簡

程昉

蘇利涉

雷允恭

閻文應

任守忠

童貫

方臘附

梁師成

楊

萬曆二十七年刊

宋史卷四百六十八

列傳

一



李祥開封人爲入內黃門資驍銳善騎射用材武中選授涇原儀渭同巡檢從景思立于河湟以功遷內殿崇班爲河州駐泊兵馬都監從郭達討交趾駐富民江賊兵大至與涇原將姚兕力戰敗之遷皇城使鎮戎軍沿邊都巡檢使從劉昌祚征靈武議功加沂州團練使或言所部兵死亡多降簡州刺史權熙河蘭會路都監總岷州兵夏人攻蘭州祥赴援保險待變數日虜徽圍去復團練使進階州防禦使從种誼襲鬼章有功升兵馬都鈐轄在熙河二十餘年以宣慶使內侍押班卒

陳衍開封人以內侍給事殿庭累官供備庫使梁惟簡

薦諸宣仁聖烈皇后主管高韓王宅領御藥院內東門

司宣仁山陵爲按行使俄以左藏庫使文州刺史出爲真定路都監御史來之邵方力詆元祐政事首言衍在垂簾日怙寵驕肆交結戚里進退大臣力引所私俾居耳目之地張商英亦論衍交通宰相御服爲之賜珠結託詞臣儲祥爲之賜膳蓋指呂大防蘇軾也衍坐貶監郴州酒稅務惟簡以援引張士良梁知新以黨附皆得罪已又編管白州徙配朱崖章惇起獄誣元祐諸老大臣云結衍輩以謀廢立士良嘗與衍同在宣仁后閣自郴州召之使實其說士良至但言宣仁彌留之際衍嘗



可否二府事及用御寶付外而已鍛鍊無所得安惇蔡  
京乃奏衍䟽隔兩宮兵隨龍內侍十餘人于外以剪除  
人主腹心羽翼意在動搖大逾不道乃詔處死令廣西  
轉運使程節洫其刑

馮世寧字靜之以入內黃門累遷昭宣使忠州團練使  
入內押班揚國公主寢疾哲宗欲夜出問訊世寧執言  
不可帝雖微忤卒爲之改容再遷景福殿使明州觀察  
使至副都知崇寧新官各世寧首知入內內侍省事禁  
中夜火使宿衛士撲滅之既定令自他途出蓋不欲使  
知宮省曲折也徽宗賞歎進感德軍留後政和初以內

密省使彰化軍留後致仕世寧出入禁闥六十年循謹  
無過卒年六十七贈開府儀同三司諡曰恭節

李繼和開封人以父任爲內侍黃門慶曆中爲河北西  
路承受保州兵叛塞城門距守官軍重圍之不得入繼  
和獨上南關門密呼所結內應者諭以禍福衆言俟李  
昭亮至卽斬關自歸已而果然賊平遷兩秩王則反貝  
州爲城下走馬承受沙苑闕馬詔秦州置場以券市之  
繼和領職不數月得馬千數而人不擾舊制內侍入仕  
三十年始得磨勘至是乃令以勞進官者無拘於年環  
州弓箭手歲時給酒州將不與衆誼訴亟闔府門不敢



出繼和步入衆中譬曉之曰汝曹爲一杯酒遂喪軀命  
乎衆悟散去事聞擢帶御器械累遷宣慶使文州團練  
使入內副都知卒子從善援例求贈官神宗曰此弊事  
也繼和無軍功何必贈自是爲定制云

高居簡字仲路世本番禺人以父任爲入內黃門護作  
溫成原廟奉神物以精辨稱超轉殿頭領後死事坐奉  
使梓夔路多占驛兵降高品歷領龍圖天章寶文閣內  
東門司幹當御藥院神宗卽位御史張唐英言其資性  
儉巧善迎合取容中丞司馬光亦言其父處近職罪惡  
已多祖宗舊制幹當御藥院官至內殿崇班以上卽須

出外今陛下獨留四人中外以此竊議况居簡頃在先  
朝依憑城社物論切齒及陛下繼統乃復先自結納使  
寵信之恩過於先帝願明治其罪以解天下之惑於是  
罷爲供備庫使稍遷帶御器械進內侍押班以文思使  
領忠州刺史卒贈輝州觀察使居簡聞外廷議論必以  
入告省中目爲高直奏仁宗時常使南海遇廣州火救  
者不力居簡督衆護軍資甲仗二庫賴以獲全事聞詔  
褒之

程昉開封人以小黃門積遷西京左藏庫副使熙寧初  
爲河北屯田都監河決棗彊醜二股河導之使東爲鋸



牙下以竹落塞決口加帶御器械河決商胡北流與御  
河合爲一及二股東流御河遂淺澱昉以開浚功遷宮  
苑副使又塞漳河作浮梁于洺州兼外都水丞詔相度  
興脩水利河決大名第五埽昉議塞之因疏塘水溉深  
州田又導葫蘆河自樂壽之東至滄州二百里塞孟家  
口開乾寧軍直河作橋于真定之中渡又自衛州王供  
堦導沙河入御河以廣運路累遷達州防禦使制置河  
北阿防水利御史盛陶言昉挾第五埽之功專爲已力  
假朝廷威福恐動州縣所開共城河頗廢人戶水磴久  
無成功又議開沁河因察訪官按行始知不便漳河滹

沱之役水占邢洺趙深祁五州之田王廣廉孔嗣宗錢  
勰趙子幾皆嘗論奏其姦欺之狀則多置撻口指決河  
所侵便爲淤田其事權之盛則舉官廢吏惟其所欲悖  
慢豪橫則受聖旨者三受提點刑獄司牒者十二故有  
違拒小人誤當賞擢驕暴自肆願遣官代還仍行究治  
神宗曰王安石以昉知河事故加任使令開漳河用工  
七百萬滹沱八九百萬已議體量矣始安石欲興水利  
驟用昉昉挾安石勢而慢韓琦後安石覺其虛誕亦踈  
之以憂死贈輝州觀察使遂罷都大制置河防水利司  
蘇利涉字公濟祖保遷自廣州以閩人從劉鋹入朝利



涉初爲入內內品慶曆中衛士之變以護衛有勞賞激  
加等英宗爲皇子利涉給事東宮及卽位遷東頭供奉  
官欲以爲穎王府都監力辭幹當御藥院遷供備庫使  
帝不豫侍醫藥最勤言輒流涕及帝崩乞與醫官同貶  
三上表待罪不許神宗卽位授達州刺史歷內侍押班  
副都知轉海州團練使僊韶院火營救甚力賜襲衣金  
帶卒年六十四贈奉國軍節度使諡曰勤僖利涉嘗幹  
當皇城司循故事朔卒遷報不皆以聞後石得一代之  
事無巨細悉以奏往往有緣飛語受禍者人始以利涉  
爲賢

允恭開封人初爲黃門頗慧黠稍遷入內殿頭給事  
東宮周懷政僞爲天書允恭豫發其事懷政死擢內殿  
崇班遷承制再遷西京作坊使普州刺史入內內侍省  
押班章獻后初臨政下謂潛結允恭凡機密事令傳達  
禁中由是允恭勢橫中外山陵事起允恭請效力陵上  
章獻后曰吾慮汝有妄動恐爲汝累也乃以爲山陵都  
監允恭馳至陵下司天監邢中和爲允恭言今山陵上  
百步法宜子孫類汝州秦王墳允恭曰何不就中和曰  
恐下有石與水爾允恭曰上無他子若如秦王墳何不  
可中和曰山陵事重踏行履按動經月日恐不及七月



之期耳允恭曰第移就上穴我走馬入見太后言之允恭素貴橫人不敢違卽改穿上穴入白其事章獻后曰此大事何輕易如此允恭曰使先帝宜子孫何惜不可章獻后意不然曰出與山陵使議可否時丁謂爲山陵使允恭具道所以謂唯唯而已允恭入奏曰山陵使亦無異議矣旣而上穴果有石石盡水出允恭竟以是并坐盜金寶賜死籍其家中和流沙門島謂尋竄海上  
闕文應開封人給事掖庭積遷至入內副都知仁宗初親政與宰相呂夷簡謀以張耆夏竦陳堯佐范雍趙積晏殊錢惟演皆章獻后所任用悉罷之退以語郭后后

曰夷簡素與文應相結使爲中詔久之乃知事由郭后夷簡遂怨后及再相楊尚二美人方寵尚美人於仁宗前有語侵后后不勝忿批其頰仁宗自起救之誤中其頸仁宗大怒文應乘隙遂與謀廢后且勸以爪痕示執政夷簡以怨力主廢事因奏仁宗出諫官竟廢后爲淨妃以所居宮名瑤華皆文應爲夷簡內應也郭后旣廢楊尚二美人益寵專夕仁宗體爲之弊或累日不進食中外憂懼楊太后亟以爲言仁宗未能去文應早暮入侍言之不已仁宗厭其煩強應曰諾文應卽以氈車



載二美人出二美人涕泣詞說云云不肯行文應罵曰  
官婢尙何言驅使登車翌日以尚氏爲女道士居洞真  
宮楊氏別宅安置旣而仁宗復悔廢郭后有復后之意  
文應大懼會后有小疾挾太醫診視數日乃言后暴崩  
寔文應爲之也累至昭宣使恩州團練使時諫官劾其  
罪請并其子士良出之以文應領嘉州防禦使爲秦州  
鈐轄改鄆州士良罷御藥院爲內殿崇班始楊尙二美  
人之出宮也左右引陳氏女入宮父號陳子城揚大后  
嘗許以爲后宋綬不可王曾呂夷簡蔡齊相繼論諫陳  
氏女將進御士良聞之遽見仁宗仁宗披百葉擇曰士  
良曰陛下閱此豈非欲納陳氏女爲后邪仁宗曰然士  
良曰子城使大臣家奴僕官名也陛下納其女爲后無  
乃不可乎仁宗遽命出之文應後徙相州鈐轄卒贈邠  
州觀察使

任守忠字稷臣蔭入內黃門累轉西頭供奉官領御藥  
院坐事廢久之復故官稍遷上御藥供奉初章獻后聽  
政守忠與都知江德明等交通請謁權寵過盛仁宗親  
政出爲黃州都監又謫監英州酒稅稍遷潭州都監徙  
合流鎮西鄙用兵又爲秦鳳涇原路駐泊都監以功再  
遷東染院使內侍押班出爲定州鈐轄加內侍副都知



累遷宣政使洋州觀察使爲入內都知仁宗未有嗣屬  
意英宗守忠居中建議欲援立昏弱以徼大利及英宗  
卽位拜宣慶使安靜軍留後守忠又語言誕妄交亂兩  
宮於是知諫院司馬光論守忠離間之罪爲國之大賊  
民之巨蠹乞斬於都市英宗猶未行宰相韓琦出空頭  
敕一道參政歐陽脩已簽趙彙難之脩曰第書之韓公  
必自有說琦遂坐政事堂立守忠庭下曰汝罪當死貶  
保信軍節度副使蘄州安置取空頭敕填與之卽日押  
行琦意以爲少緩則中變也守忠久被寵幸用事于中  
人不敢言其過及貶中外快之久之起爲左武衛將軍  
致仕卒年七十九

童貫少出李憲之門性巧媚自給事官掖卽善策人主  
微指先事順承徽宗立置明金局于杭貫以供奉官主  
之始與蔡京游京進貫力也京旣相贊策取青唐因言  
貫嘗十使陝右審五路事宜與諸將之能否爲最悉力  
薦之合兵十萬命王厚專闔寄而貫用李憲故事監其  
軍至湟川適禁中火帝下手札驛止貫母西兵貫發視  
遽納鞞中厚問故貫曰上趣成功耳師竟出復四州擢  
景福殿使襄州觀察使內侍寄資轉兩使自茲始未幾  
爲熙河蘭湟秦鳳路經略安撫制置使累遷武康軍節



度使討溪哥藏征復積石軍洮州加檢校司空頗恃功  
驕恣選置將吏皆捷取中旨不復關朝廷寢拂京意除  
開府儀同三司京曰使相豈應授宦官不奉詔政和元  
年進檢校太尉使契丹或言以宦官爲上介國無人乎  
帝曰契丹聞貫破羗故欲見之因使覘國策之善者也  
使還益展奮廟謨兵柄皆屬焉遂請進築夏國橫山以  
太尉爲陝西河東河北宣撫使俄開府儀同三司簽書  
樞密院河西北兩房不二歲領院事更武信武寧護國  
河東山南東道劔南東川等九鎮太傅涇國公時人  
稱蔡京爲公相因稱貫爲媼相將秦晉銳師深入河隴  
薄于蕭關古骨龍謂可制夏人死命遣大將劉法取朔  
方法不可貫逼之曰君在京師時親授命於王所自言  
必成功今難之何也法不得已出塞遇伏而死法西州  
名將旣死諸軍恟懼貫隱其敗以捷聞百官入賀皆切  
齒然莫敢言關右旣困夏人亦不能支乃因遼人進誓  
表納欵使至授以誓詔辭不取貫彊館伴使固與之還  
及境棄諸道上舊制熟羗不授漢官貫故引拔之有至  
節度使者弓箭手失其分地而使守新疆禁卒逃亡不  
死而得改隸他籍軍政盡壞政和元年副鄭久中使于  
遼得燕人馬植歸薦諸朝遂造平燕之謀選健將勁卒



刻日發命會方臘起睦州勢甚張改江浙淮南宣撫使  
卽以所聚兵師諸將討平之

方臘者睦州青溪人也世居縣場村託左道以惑衆初  
唐末徽中睦州女子陳碩真反自稱文佳皇帝故其地  
相傳有天子基萬年樓臘益得憑籍以自信縣境梓桐  
幫源諸峒皆落山谷幽險處民物繁夥有漆楮杉材之  
饒富商巨賈多往來時吳中困於朱勛花石之擾比屋  
致怨臘因民不忍陰聚貧乏游手之徒宣和二年十月  
起爲亂自號聖公建元永樂置官吏將帥以巾飾爲別  
自紅巾而上凡赤等無弓矢介冑唯以鬼神詭祕事相

扇詆焚室廬掠金帛子女劫掠良民爲兵人安於太平  
不識兵革聞金鼓聲卽斂手聽命不旬日聚衆至數萬  
破殺將官蔡遵于息坑十一月陷青溪十二月陷睦歙  
二州南陷衢殺郡守彭汝方北掠新城桐廬富陽諸縣  
進逼杭州郡守棄城走州卽陷殺制置使陳建廉訪使  
趙約縱火六日死者不可計凡得官吏必斷齋文體探  
其肺腸或熬以膏油叢箭亂射備盡楚毒以償怨心警  
奏至京師王黼匿不以聞於是凶焰日熾蘭溪靈山賊  
朱言吳邦剡縣讐道人仙居呂師囊方巖山陳十四蘇  
州石生歸安陸行兇皆合黨應之東南大震發運使陳



亨伯請調京畿兵及鼎澧槍牌手兼程以來使不至滋  
蔓徽宗始大驚亟遣童貫譚稹爲宣撫制置使率禁旅  
及秦晉蕃漢兵十五萬以東且諭貫使作詔罷應奉局  
三年正月臘將方七佛引衆六萬攻秀州統軍王子武  
乘城固守已而大軍至合擊賊斬首九千築京觀五賊  
還據杭二月貫稹前鋒至青州堰水陸並進臘復焚官  
舍府庫民居乃宵遁諸將劉延慶王稟王渙楊惟忠辛  
興宗相繼至盡復所失城四月生擒臘及妻邵子毫二  
太子僞相方肥等五十二人於梓桐石穴中殺賊七萬  
四年三月餘黨悉平進貫太師徙國楚臘之起破六州  
五十二縣戕平民二百萬所掠婦女自賊峒逃出保而  
縊於林中者由湯巖嵯嶺八十五里間九村山谷相望  
王師自出至凱旋四百五十日臘雖平而北伐之役遂  
起旣而以復燕山功詔解節鉞爲真三公加封徐豫兩  
國越兩月命致仕而代以譚稹明年復起領樞密院宣  
撫河北燕山宣和七年詔用神宗遺訓能復全燕之境  
者朕本邦疏王爵遂封廣陽郡王是年粘罕南侵貫在  
太原遣馬擴辛興宗往聘以嘗金金人以納張覺爲責  
且遣使告興兵貫厚禮之謂曰如此大事何不素告我  
使者勸貫速割兩河以謝貫氣褫不能應謀遁歸太原



守張孝純詣之曰金人渝盟王當令天下兵悉力枝梧  
今委之而去是棄河東與敵也河東入敵手柰河北乎  
貫怒叱之曰貫受命宣撫非守土也君必欲留貫置帥  
何爲孝純拊掌嘆曰平生童太師作幾許威望及臨事  
乃蓄縮畏懼奉頭鼠竄何面目復見天子乎貫奔入都  
欽宗已受禪下詔親征以貫爲東京留守貫不受命而  
奉上皇南巡貫在西邊募長大少年號勝捷軍幾萬人  
以爲親軍環列第舍至是擁之自隨上皇過浮橋衛士  
攀望號慟貫唯恐行不速使親軍射之中矢而踣者百  
餘人道路流涕於是諫官御史與國人議者竄起初股  
左衛上將軍連誥昭化軍節度副使竄之英州吉陽軍  
行未至詔數其十大罪命監察御史張徵迹其所至菴  
斬之及於南雄旣誅函首赴闕梟于都市貫握兵二十  
年權傾一時奔走期會過於制敕嘗有論其過者詔方  
劾往察劾一動一息貫悉慎得之先密以白且陷以他  
事劾反得罪逐死貫狀魁梧偉觀視願下生須十數皮  
骨勁如鐵不類閩人有度量能踈財後宮自妃嬪以下  
皆獻餉結內左右婦寺維譽言日聞寵嬖翁赫庭戶雜  
還成市岳牧輔弼多出其門廝養僕圍官諸使者至數  
百輦窮姦稔禍流毒四海雖植醢不償責也



梁師成字守道慧黠習文法稍知書初隸賈詳書藝局  
詳死得領睿思殿文字外庫主出外傳道上旨政和間  
得君貴幸至竄名進士籍中積遷晉州觀察使興德軍  
留後建明堂爲都監旣成拜節度使加中太一神霄宮  
使歷護國鎮東河東三節度至檢校太傅遂拜太尉開  
府儀同三司換節淮南時中外泰寧徽宗留意禮文符  
瑞之事師成善逢迎希恩寵帝本以隸人畜之命入處  
殿中凡御書號令皆出其手多擇善書吏習倣帝書雜  
詔旨以出外廷莫能辨師成實不能文而高自標榜自  
言蘇軾出子是時天下榮誦軾文其尺牘在人間者皆

毀去師成訴於帝曰先臣何罪自是軾之文乃稍出以  
翰墨爲已任四方儁秀名士必招致門下往往遭點污  
多寘書畫卷軸於外舍邀賓客縱觀得其題識合意者  
輒密加汲引執政侍從可階而升王黼父事之雖蔡京  
父子亦諂附焉都人目爲隱相所領職局至數十百黼  
造伐燕議師成始猶依違卒乃贊決又薦譚稹爲宣撫  
燕山平策勲進少保益通賄謝人士入錢數百萬以獻  
頌上書爲名令赴廷試唱第之日侍於帝前囁嚅升降  
其小吏儲宏亦豫科甲而執廝養之役如初李彥括民  
田於京東西所至倨坐堂上監司郡守不敢抗禮有言



於帝師成適在旁抗聲曰王人雖微序於諸侯之上豈足爲過言者懼而止師成貌若不能言然陰賊險鷲遇間卽發家居與黼隣帝幸黼第見其交通狀已怒朱勔又以應奉與黼軋因乘隙攻之帝罷黼相師成由是益絀郢王楷寵盛有動搃東宮意師成能力保護欽宗立嬖臣多從上皇東下師成以舊恩留京師於是太學生陳東布衣張炳力疏其罪炳指之爲李輔國且言宦官表裏相應變恐不測東復論其有異志攘定策功當正典刑帝迫於公議猶未誦言逐之師成疑之寢食不離帝所雖奏廁亦侍於外久未有以發會鄭望之使金營還帝命師成及望之以宣和殿珠玉器玩復往先令望之詣中書諭宰相至則留之始詔暴其罪責爲彰化軍節度副使開封吏護至貶所行次八角鎮縊殺之以暴死聞籍其家

楊戩少給事掖庭主掌後苑善測伺人主意自崇寧後日有寵知人內侍省立明堂鑄鼎彝起大晟府龍德宮皆爲提舉政和四年拜彰化軍節度使首建期門行幸事以固其權勢與梁師成埒歷鎮安清海鎮東三鎮由檢校少保至太傅遂謀撼東宮有胥吏杜公才者獻策于戩立法索民田契自甲之乙乙之丙展轉究尋至



無可證則度地所出增立賦租始於汝州浸淫于京東  
西淮西北括廢隄棄堰荒山退灘及大河淤流之處皆  
勒民主佃額一定後雖衝蕩回復不可減號爲西城所  
築山濼古鉅野澤綿亘數百里濟鄆數州賴其蒲魚之  
利立租筭船納直犯者盜執之一邑率於常賦外增租  
錢至十餘萬緡水旱蠲稅此不得免擢公才爲觀察使  
宣和三年戩死贈太師吳國公而李彥繼其職彥天資  
狠愎密與王黼表裏置局汝州臨事愈劇凡民間美田  
使他人投牒告陳皆指爲天荒雖執印券皆不省魯山  
鬪縣盡括爲公田焚民故券使田主輸租佃本業訴者  
輒加威刑致死者千萬公田旣無二稅轉運使亦不爲  
奏除悉均諸別州京西提舉官及京東州縣吏劉寄任  
輝彥李士漁王滄毛孝立王隨江惇呂坯錢棫宋憲皆  
助彥爲虐如奴事主民不勝忿痛前執政冠帶操笏迎  
謁馬首獻媚花朝夕造請賓客徑趨謁舍不敢對之上  
馬而彥處之自如發物供奉大抵類朱勔凡竹數竿用  
一大車牛驢數十頭其數無極皆責辦於民經時閱月  
無休息期農不得之田牛不得耕墾殫財靡芻力竭餓  
死或自縊轅輓閭如龍鱗薜荔一本輦致之費踰百萬  
喜賞怒刑禍福轉手因之得美官者甚衆頽昌兵馬鈐



韓范寥不為取竹誣刊蘇軾詩文于石為十惡朝廷察其据撫亦令勒停當時謂朱勔結怨于東南李彥結怨於西北靖康初詔追戢所贈官爵彥削官賜死籍其家劉寄以下十人皆停廢復范寥官

宋史卷四百六十八終

宋史卷四百六十九

列傳第二百二十八

開府醫官司在國錄軍國重事前監醫者各相監脩國史領經筵事都總裁脫脫等脩

皇明朝列大夫國子監祭酒臣方從哲

承德郎春坊右管學士黃汝良等奉

勅重校刊

宦者四

邵成章

藍珪

馮益

張去為

陳源

甘昇

王德謙

闕禮

董宋臣

邵成章欽宗朝內侍也帝入青城命成章衛皇太子赴



宣德門稱制行事太子北去成章留于汴康王將卽位元祐太后遣成章奉乘輿服御至南京從幸揚州金人掠陝西京東諸郡羣盜起山東黃潛善汪伯彥匿不以聞及張遇焚真州去行在六十里帝亦不之知也成章上疏條具潛善伯彥之罪曰必誤國且申潛善等使聞之帝怒除名南雄州編管侍御史馬伸言成章緣上書得罪今是何時以言爲諱久之帝思成章忠直召赴行在其徒忌之諧于帝曰邵九百來陛下無歡樂矣遂止之于洪州金人人洪聞其名訪求得之謂之曰知公忠正能事吾主可坐享富貴成章不應脅之以威亦不從金人曰忠臣也吾不忍殺遺之金帛而去

藍珪康履初皆爲康王府都監入內東頭供奉官嘗從康王使金人行營及開元帥府並主管機宜文字朝廷遣人趣師入援履等請王留相州王叱之而行旣卽位二人俱恃恩用事履尤妄作威福大將如劉光世等多曲意事之帝知之詔內侍不許與統兵官相見違者停官編隸履終無所忌憚與內侍會擇凌忽諸將或踞坐洗足立諸將於左右聲喏甚至馬前故疾之者衆俄遷內侍省押班金州觀察使帝在揚州金兵卒至帝馳馬出門百官不戒備從行者惟履等五六人自是履等益



自銜愈有輕外朝心及幸浙道吳江其黨競以射鴨爲樂比至杭州江下觀潮中官供帳赫然遮道統制苗傳等切齒曰此輩使天子至此猶敢爾邪傳幕客王世脩亦疾中官恣橫以告武功大夫劉正彥正彥曰會當共除之王淵躋樞筦正彥以爲由宦者所薦愈不平謀遂決伏兵斬淵遣兵圍履家分捕中官凡無須者皆殺之履馳入白帝傳等至厲聲曰陛下信任中官凡中官所主者皆得美官王淵遇賊不戰交康履得樞密中官在外者已誅更乞康履藍珪曾擇等誅之以謝三軍帝不聽除傳等官以安之傳等曰欲遷官第須控兩匹馬與內侍何必至此帝問百官策安出主管浙西機宜文字時希孟曰中官之爲患至此極矣不除之天下之患未已軍器監葉宗謬言陛下何惜一康履不以慰三軍帝不得已遣人執履至履望帝呼曰大家何獨殺臣遂以付傳卽腰斬之梟其首帝幸睿聖宮傳等留內侍十五人奉左右尋捕珪擇等皆編置遠州擇昭州行一程追還斬之傳等誅贈履官諡榮節召珪等還中書舍人季陵言中官復召其黨與相賀氣燄益張中外切齒不報珪至自武功大夫擢內侍省押班慈寧宮建命提點事務尋升內侍省都知及迎太后命充都大主管太后旣



還宮珪奏應干補授恩乞聽慈寧宮施行從之珪初與履同進而驕橫不及履故幸以壽終有安石者與珪同姓爲內待省副都知至景福殿使湖州觀察使卒贈保寧軍節度使諡良恪渡江後中官贈諡自安石始又有與履同姓者名諶爲內待省押班亦親幸用事與知閣門事藍公佐善每邀公佐至其直舍必縱飲大醉薄莫乃歸嘗漏泄禁中語劉光遠被劾諶與內侍陳永錫受其金力爲營救言官劾之帝詔永錫與祠諶送吏部後累官至均州觀察使卒贈保信軍節度使諡忠定

馮益康王邸舊人也王卽位自入內東頭供奉官遷至

幹辦御藥院尋兼幹辦皇城司侍舊恩驕恣帝幸浙東益與御前右軍都統制張俊爭渡以語侵俊且訴于帝事下御史臺侍御史趙鼎言明受之變起于內侍覆轍不可不戒事乃已紹興三年授武功大夫康州防禦使帶御器械時帝用侍御史常同言詔皇城司並隸臺察益言非祖宗舊制帝爲追寢前詔特遷宣政使益自言藩邸舊吏乞加恩遂升明州觀察使內廐舊有騏驥院官益請別置御馬院自領其事又擅穿皇城便門侍御史沈與求以爲言趙鼎等皆患之會劉豫揭榜山東言益遣人收買飛鴿因有不遜語張浚請斬益以釋謗帝



不許鼎言事關國體當解職加罰帝喜曰聞益交關外事漸不可長與祠放歸浚意未息鼎解之益自是家居廩祠者十四年先是僞柔福帝姬之來自稱爲王貴妃季女益自言嘗在貴妃閣帝遣之驗視益爲所詐遂以真告及事覺益坐驗視不實送昭州編管尋以與皇太后連姻得免十九年卒于家

張去爲內侍張見道養子也初爲韋太后宅提點官累遷至安德軍承宣使帶御器械又遷內侍省押班時見道爲入內內侍省押班父子並充景福殿使去爲寢有寵請以一官回授見道帝嘉而許之其後見道以保康軍承宣使致仕而去爲與秦檜王繼先俱用事升延福宮使累遷至入內內侍省都知恃恩干外朝謀議金兵將至遣使來出慢言以相懼去爲陰沮用兵進幸蜀之計宰相陳康伯力非之帝悟而止侍御史杜莘老乞斬去爲以作士氣先是去爲取御馬院西兵二百人髡其頂髮都人駭之莘老復劾其罪帝不得已令去爲致仕莘老亦出補外及內禪詔落致仕提舉德壽宮行移如內侍省仍鑄印賜之脩宮有勞又特遷安慶軍承宣使初安恭后入宮去爲實進之后崩上皇又遣去爲傳旨立謝貴妃爲后故亦貴重然至死不復涉朝廷事



陳源淳熙中提舉德壽宮頗有寵俄帶浙西副總管給事中趙汝愚言內侍不當干軍政遂罷源侍愚顯恣本宮壽史徐彥通者爲源掌家務不數歲官至經武大夫甄士昌源廝役也工理髮奏補承信郎又補臨安府都吏李庚以官使之窺伺府事孝宗聞而惡之十年春詔源應奉日久特落階官與京祠給事中宇文价封還錄黃改外祠臺官黃洽等又劾之乃謫源建州居住籍其貲進德壽宮彥通除名道州編管士昌庚皆抵罪言者猶未已移源郴州源有園名小隱其制視禁籞有加高宗以賜王才人光宗卽位復召還紹熙四年自拱衛大夫永州防禦使除入內內侍省押班帝以疾不朝重華宮源與內侍楊舜卿林億年數有間言寧宗卽位命三人俱事光宗于泰安宮御史章穎論其離間君親乞行誅竄以慰壽皇在天之靈詔罷源等官源撫州億年常州居住舜卿任便居住慶元二年以生皇子恩源億年常許自便舜卿與內祠給事中汪義端駁之乃移源婺州億年湖州義端再駁舜卿內祠反坐外補其後源等卒聽自便億年養娼女以別業源在貶所與妓濫俱以淫媒闖人疑其非宦者云

甘昇內侍省押班澤之子澤之死昇累遷亦至押班乾



道中帝頗親昇昇以此用事臨安尹胡與可爲小官時  
丐貸於臨安富民馬氏不如欲銜之至是馬以鬻官鹽  
踰格繫獄與可諷有司以私鹽論御史陳升卿決獄平  
反之昇之子婦與可女也乃陰爲與可地譖升卿于帝  
前謂爲豪民馬請事所得至萬緡上疑遂論罪馬流嚴  
州升卿由是罷去時曾覲以使弼領京祠王抃以知閣  
門兼樞密都承旨昇爲入內押班相與盤結士大夫無  
耻者爭附之旣而覲死抃逐獨昇在朱熹力言之帝曰  
昇乃德壽宮所薦謂有才耳熹曰姦人無才何以動人  
主昇用事二十年招權市賄黃由對策亦頗及之後帝

察其姦遂抵之罪籍其貲竟以廢死弟昷淳熙末幹辦  
內東門司帶御器械光宗朝累遷至親衛大夫保康軍  
承宣使提舉佑神觀慶元初爲內侍省都知帝過壽康  
宮昷有力焉遷官二秩頗貴寵

王德謙初爲嘉邸都監頗親幸孝宗大漸光宗以疾久  
不朝重華宮黃由時爲王府贊讀奏讀嘉王詣重華宮  
問疾旣得旨德謙固請覆奏王斥之遂行孝宗崩王在  
喪次中外洶洶王以告直講彭龜年龜年以爲建儲則  
人心安須白中宮乃可卽諭德謙奏之皇太后德謙不  
敢強之旣而無報王卽位德謙累遷昭慶軍承宣使內



侍省押班賜居第驕恣踰法服食擬乘輿出入或以導  
駕燈籠自奉爲人求官職以巨萬許泄其事者禍立至  
故外朝多附之中書舍人吳宗昱事之尤謹夜則易服  
造謁德謙求爲節度使先薦宗昱爲刑部侍郎直學士  
院將使草麻宗昱先備草示之引天寶同光爲比德謙  
喜制出參政何澹不肯署諫議大夫劉德秀率臺諫論  
列宰相京鏗復以爲言命遂寢韓侂胄與德謙爭用事  
德謙屢以計勝侂胄擠之詔與外祠臺諫又交章論駁  
侍御史姚愈言吳宗昱嘗草德謙制遂罷其官愈又率  
同列力攻德謙詔送廣德軍居佳尋以臨安尹劾其賊

濫僭擬詔降團練使移居撫州他事勿問中書舍人高  
文虎請改爲安置臺諫復言其姦詭乞自今不以赦移  
雖特旨亦許執奏帝用其言德謙遂坐廢斥以死  
闕禮高宗朝宦者淳熙末積官至親衛大夫保信軍承  
宣使孝宗頗親信之後命提舉重華宮孝宗崩光宗疾  
不能執喪樞密趙汝愚等請建儲以安人心光宗御批  
又有念欲退閑語丞相留正懼納祿去人心愈搖汝愚  
遣戚里韓侂胄因內侍張宗尹以禪位之議奏太皇太  
后曰此豈可易言明日汝愚再遣侂胄附宗尹以奏未  
獲命而侂胄退與禮遇禮知其意問之侂胄不以告禮



指天自誓不言侂胄遂白其事禮卽入宮泣告太后以時事可憂之狀且曰留丞相已去所恃者趙知院耳今欲定大計而無太皇太后之命亦將去矣太后驚曰知院同姓也事體與他人異禮曰知院未去恃有太后耳今有請不許計無所出亦惟有去而已知院去天下將若何太后悟遂命禮傳旨侂胄以諭汝愚約明日太后垂簾上其事又明日嘉王入行禫祭汝愚卽簾前進呈御批太后遂命王卽皇帝位尋除禮入內內侍省都知又差兼重華慈福宮承受充提舉皇城司遷中侍大夫禮不以功自居乞致仕不許乞免推恩又不許南渡後內侍可稱者惟邵成章與禮云

董宋臣理宗朝宦者淳祐中以睿思殿祗候特轉橫行官寶祐三年兼幹辦佑聖觀侍御史洪天錫劾之不報天錫坐左遷大理少卿開慶初大元兵駐江上京師大震宋臣贊帝遷幸寧海軍簽判文天祥上疏乞誅宋臣又不報景定四年自保康軍承宣使除入內內侍省押班尋兼主管太廟往來國信所同提點內軍器庫翰林院編脩敕令所都大提舉諸司提點顯應觀主管景獻太子府事會天祥以著作佐郎兼獻景府教授義不與宋臣聯事上書求去天祥出知瑞州言者論宋臣不置



宋史卷四百六十九終  
帝曲爲諭解庇之秘書少監湯漢上封事亦言宋臣十  
餘年來聲焰薰灼其力能去臺諫排大臣至結兇渠以  
致大禍中外惶惑切齒而陛下方爲之辨明大臣方爲  
之和解此過計也願收還押班等除命不勝宗社之幸  
疏入帝亦不之省六月命主管御前馬院及酒庫既卒  
帝猶命特轉節度使其見寵愛如此



